

Jesucristo Juan Ōimani Keskara

Afara afeskara ixiai anori Jesucristo Juan tāpimani

1 ¹⁻²Efe yora mīstichi, iskaratīa ē mato kirika kenexō fomai mā tāpinō. Ēkīa Juan ē mato kirika kenexō fomai. Nai mēraxō Epa Niospa Jesucristo yoini afe keskara a inōpokoaifo nāmānoafo a yonoxomisfo tāpimaximākai. Askafaito nikakī Jesús āfe ājiri ekeki nīchia. Anoxori ea ājirinī yoinō afe keskara ikimākai nāmānoafo. Ea ōimanaito mē ōia a inōpokoaifo xafakīakōi. Askaito ōikī ē kirika kenea a inōpokoaifo anori a Niospa Jesús yoia anorikōi mā tāpisharakōinō.

³Na ē mato yoiai ikataima. A inōpokoai ē mato yoiai na kirika ano. Nā ōikani fetsafori inimanōfo. Askatari a nikaifori chanīmara fakanax, afori inimaxikani. Nā ē mato yoiai keskai mā samamashta iki. Ea nikasharakāfe.

Juan a ichanāmisfo anoafo siete Nios yoiti pexe ano a to kirika kenexō fomani tāpinōfo

⁴⁻⁵Nā Asia mai anoafo a Nios Ifofaafō tii siete pexefo anoafo ē mato kirika kenexō fomai. A ē mato yoiai anori ōisharakōikāfe. Afetīama Epa Nios niyopaofinixakī iskaratīa nia. Epa Nios nīpanaka. Āfe Yōshi Sharari afe itiani. Nāskakē Epa Nios feta āfe Yōshi Sharapa, āfe Fake Jesucristo mato noikī mātō ōiti mēra mato shināmasharapainō

afanā mātō ōiti fekaxtefanōma. Nāskakē nōko Ifo Jesucristo Niospa meka noko yoimis chanīmakōi. Jesúsfi Niospa Fakekōifekē retenifo. Mā retexō maifafiafono Apa Niospa anā otofani anā nanakama. Fato fetsa askayomisma. Nāskaxō Apa Nios fe rafexō a xanīfofo maitio anoafo ato īkixii xanīfokōi ixō. Aatofi noko noikōiakī, āfe imi foax noko nāxonī Satanás chaka nōko ifo inōma. ⁶Nō aōnoax nō Epa Nios afe yorakōi ixō noko yonomapaiyai keskafakī nō anō. Nō askai afe yorakōifo ixō nōri yora fetsafo nō kīfixotiro Epa Niospa noko nikai. Nāskarafoskōi nōko Ifo Jesucristo noko imai. Nāskakē keyokōi yorafāfe aōxō iskafakakī yoipakenakafo: “Aicho, tsoa fetsakai na Jesús keskarama. Nā fisti sharafinakōia. Ares fisti nōko Ifo nīpanaka. Ares fisti keyokōi yorafo ato īkipakenaka,” ixō yoipakenakafo. Askapakexapainō.

⁷Ōikapō. Oa nai kōi keskara sharakōi nōko Ifo Jesús oaito keyokōi yorafāfe ōixikani. Askatari a retenifāferi ōikani, akiki rāfixikani. Oaito ōikani keyokōi yorafo a Ifofamisfomafo, “¿Afeskakī nō Jesús Ifofamismamē?” ikanax oiaxikani, shināmitsakōixikani.

⁸Epa Niospa yoia: “Afara onifataima ē iyopaoni. Ēfi nīpanakakī. Afetīara na nōko mai keyoai eres fisti ē ato yoitiro. Nāskaxō ē afama mīshti famis. Akka ē niyopaoni. Nāskatari ē nīpanaka,” ixō nōko Ifo Niospa yoia.

**Nōko Ifo Jesucristo āakōi oa namakē ōiai
keskara Juan ōimani**

9Ēkīa Juan, ē māto ochikōi. Nāskax māri Jesús Ifofaax mā efe yorakī. Askax mā aōnoax omiskōifikī, mā tenemis. Nāskariai ēri aōnoax omiskōifikī ē tenei. Ē Niospa meka ato yoita Jesúsnoari ē ato yoimis. Ea nikakaspakakī, āto xanīfāfe sorarofa ea achimaxō, fakafā nakirafe ea ato nīchimana āfe nāsīmā, āfe ane Patmos ano. 10Ē mato yoinō, ea nikakāfe. Anoxō iskafani. A Jesús otoni penata, nomīkonō, Niospa Yōshi Sharapa ea īkixō a ea tāpimapaiyai ea ōimana. Oa namakē nō ōimis keskara xafakīakōi ea ōimana. Askata ea kachiorixori fāsikōi oa xāaiti keskarato ea yoiaito ē nika. 11“Nā mī ōiaifo fetsafo kenexōfe. A kirika kenexō Jesús Ifofamisfo tii ato fomafe. A siete Nios yoiti pexe anoafō Asia anoafō fomafe, afāfe ōinōfo. A Nios Ifofamisfo a pexe tii Efeso anoafō fomata, Esmīrnā anoafō fomata, Pērgamo anoafō fomata, Tiatira anoafō fomata, Sardis anoafō fomata, Filadelfia anoafō fomata, Laodicea anoafōi nā mī ōiaifo ato kirika kenexō ato fomafe,” ea faa.

12Ea askafaito ē fesoakekafā ē ōia tsōa ea yoimākai ixō. Ē ōia siete oa rāpari efapa ōta keskara oro ē ōia. 13Nāskai rāpari nakirafe feronāfake xanīfo finakōia nia keskara ē ōia. Āfe tari āfe tae fepokōia, āfe sītorari orokōi aō nonexemea ika. 14Askata āfe foo oxokōi. Askatari āfe fero oa chii keskara xafakīakōi. (Nāskarifiakī xafakīakōi Jesús noko ōitiro a nō shināi keskara.) 15Askatari āfe taeri chaxasharakōia ika. Āfe mekari oa oi kaya feaito nō nikamis keskarakōi. 16Āfe pōya kayakai aōri āfe mifi kamaki siete fishi keskara ika. Āfe ana keno chainipa keskara aostamea ika. Askatari āfe femānā fafekōi oa xini nō ōimis keskara ika.

17Nāskara ōi ē pakea, oa nai keskara. Ē askaito ōikī ea ramā āfe mifi kayakai aōxori. Ē askaito ea yoia iskafakī: “Rateyamafe. Ē Jesúski. Afara onifataima ē iyopaoniki. Ēfi anā nanakamaki. 18Iskaratīari ē nia. Mē nafianixakī, iskaratīa ē nia. Ē anā nanakama. Ē anā afeska pishta nakama. Eres fisti ē ato namata, chiiāfā mēra ē ato potatiro a ea nikakaspamisfo. 19Nāskakē a mī taefakī ōiafo kirikaki kenefe. Askatari na mī iskaratīa ōiaifori kirikaki kenefe. Askatari a chipo ixiaifori kenefe. 20Ē mia yoinō afeskai siete fishimē ēfe mēke kayakai aōri; askatari afeskai siete rāpari oro keskara otamāki. Na siete fishi mī ōiai nāato noko shināmamis siete Niospa meka yoimisfo Nios yoiti pexe mēranoa ichanāmamisfo. Askatari nā siete rāpari keskara mī ōiai nāatori noko shināmamis siete Nios yoiti pexe mēranoax ichanāmamisfo Nios Ifofakanax,” ixō ea faa.

**Jesús a Ifofafo Efeso
anoafō ato yoini taekōifakī**

2 1Jesús ea yoia iskafakī: “Efeso anoxō a ea Ifofafo a ato Niospa meka yoimisto na kirika ato anexonaito nikanōfo, iskafakī kenexōfe: ‘Ēkīa māto Ifo Jesús keyokōi yorafo ēfe Epa Niospa meka yoimisfo ē ato kexetaifaa. A ē mato yoiai anori ea nikasharakōikāfe. 2A mā ikai keskara mē tāpia, mē mato ōi. Māfi eōxō fāsi yonosharakōimiskī. Afara fetsa afeskara afaito mā tenekōimis. A yorāfāfe afarafo chakafamisfo anorikai mā tāpipaimisma. Akiki mā inimapaimisma afara chakafaifono, nāskax mā ato fe rafekaspamis. Yora fetsafāferi mato yoikī iskafakani: “Cristo ea nīchia ē mato yoinō,” ixō mato yoiaifāfe, “Nō ato nikayonō,” ixō mā ato nikataifaa. Fanīrira mato yoiaito anā chanīki

yoimara mā faima mē mato ōia mā askafaito. Anorima yoi āa chanīmisfo mā mā tāpia. ³Nāskax mā eōnoax omiskōikī mā tenemis ea potakaspakī. ⁴Mā anori shara shināfīmiskē ē anā meka fetsari yoinō. Taefakī mā ea noiyopaonixakī anā iskaratīa mā ea anā noisharaima. Mā mā ea shināmaki fetsea. ⁵Shināsharakāfe a mā taefakī shināyopaoni anori. A ea noikī mā taefani keskafakī anā ea noikāfe. Askatari mā ranā mā nōināyopaoni keskakōikāfe. Akka mā ea tanaima, oa chii nokaito nō anā kēfefatiro keskafakāfe ea shinākī. Mā ea Ifofasharayamainokai chipo tsōa anā mato tanaima. Mā ichanāi ano anā tsoakai mato fe ichanāima. ⁶Mā askafixō afara fetsa mā shara famis. A feronāfake āfe ane Nīkoraita fanīrira yoiaito nikakakī atirifāfe mato anoxō nikakaxō, afāferi chakafamisfo keskafakī ēri ato noikaspai. A ē noikaspai keskafakī māri efeta noikaspai. ⁷Mā pachoyakī ea nikakōikāfe. Niospa Yōshi Sharapa mato yoiaito nikasharakōikāfe. Satanās mato fanīrira shināmapaimiskī. A Satanās finōinifōfā ea kachikiri fatama ea Ifofasharakōiaito, aafi Epa Nios ano ē ikimaxii efe isharapakexanō,” ixō Jesús ea yoia anori Efeso anoafō a chanīmara faafo ato ē kenexonō.

Jesús Ifofafo Esmīrnā anoafō ato yoini

⁸Anā Jesús ea yoia iskafakī: “A ea Ifofamisfo Esmīrnā anoafō a ato Niospa meka yoimis ē yoinō ea kirika kenexōfe iskafakī: ‘Ēkīa mātō Ifo Jesús ē mato yoi mā tāpinō. Ea nikasharakāfe. Nā afama mīshti onifataima ē iyopaoni. Iskaratīa ē nīpanaka. Mē nayofinixakī ē anā nanakama. Ē mato nonori yoi iskafakī: ⁹Mā omiskōiaito mē ōi. Askatari mā afaayafoma. Mā askafiaino ē mato fe ikano, ea keskarari mā shara itiro. Mē

tāpia matoōnoa yora fetsafāfe meka chakayoiaifāfe. “Nō judeofo, nō Nios Ifofamis,” ikaxō yoiaifo afokai efe yorafoma. Afofi Satanās yorafoki. ¹⁰Akka a inōpokoai ē mato yoinō. Satanās ifofaafāfe fatora fetsa fisti mato karaxa mēra ikimaxikani mā ea shināmakimāikai ōixikakī. A mato mesenifaifono rateyamakāfe. Ea shināmakitama nonori shinākāfe iskafakī: “Ea retēfiaifono ē meseima, ē Nios ari kai. Ēfe Ifāfe ea potanakama. Ē ēfe Ifo noikī finakōifafāini,” ixō yoikāfe. Mā askax, nakē, ē mato īkipakenaka mā efe īpaxanō. ¹¹Mā pachoyakī nikasharakōikāfe Niospa Yōshi Sharapa mato yoiaito mā Jesús Ifofakī. Fetsa omiskōifikī ea shināmakiyamaito Satanās afeskafatiroma. Nāskax naax a omiskōipakenakafo mēra katiroma,” ixō anori Jesús ea yoia a Ifofafo Esmīrnā anoafō ē ato kenexonō.

Jesús Pérgamo anoafō a chanīmara faafo ato yoini

¹²Anā Jesús ea yoia iskafakī: “A ea Ifofamisfo Pérgamo anoafō a ato Niospa meka yoimis a ē yoipaiyai anori ē yoinō ea kirika kenexōfe tāpinōfo. Iskafakī kenefe: ‘Ēkīa mātō Ifo Jesús ē mato yoi mā tāpinō. Ēfe meka oa keno chainipa takairafe ikikōiai keskaraxō, ēfe mekapas a ea noikaspaifo tii ē ato chakafatiro kopikī. ¹³Mē tāpia a pexe rasi Pérgamo ano mā ika. A Pérgamo anoafāfe Satanās nikakōikani. Askaito ōi mā mesemisma, ea Ifosharafai. “Jesús nōko Ifokōi,” ixō mā ato yoimis. A ea Ifofamis fetsa āfe ane Antipas eōnoa ato yoimis ōikī mā reteafō noikaspakakī. Mā reteifāfe ōifiax mā atoki meseima, mā ea chai faama. Mātō ōiti mēra mā shināsharakōi. “Noko retēfiaifonokai nōko Ifo Jesús nō chai faima,” ixō mā yoimis. Anori mā shināi sharakōi.

14-15 Akka nāno afara fetsa a sharama ē mato yoipai. Fatora mā fetsa a Balaam afara chaka yoini keskara mā shināmakikaspai. Akka taeyoi xanīfo Balac israelifo chakana famapaini. Nāskaxō Balaam yōkani: “¿Afeska xō mī kaifo ē ato chakana famatiromē?” faito, Balaam kemani iskafakī: “Mī ato yoitiro mī fista mēra ato ikikixiki. Nā mā akai keskari akairi anōfo. Nā nōko niosra ixō afara onifaxō a mā piāi mā ināmis. Nā israelifāfe pikanax chakananōfo mātō fista mēranoax. Askatari āto āfima fe ikanax chakananōfo,” fani. Iskaratīari nāskarāfori mā fisti rasi chakanāfo nā Nicolaitafāfe ato afara chaka tāpimanaifo keskara ikafo. 16 Nāskakē anā iskaratīa askafayamakāfe. Nios Ifofakāfe, anā shinākāfe. Mātō chaka xatekāfe shināmitsayanā. Akka mā chaka xateyamaito, ē matoki samamashta nokoxō ēfe mekapa ē mato kopikī chakafatiro mā omiskōinō. Ēfe mekafī oa keno ikiai keskarakōikī. 17 Mā pachoyaki ea nikakāfe. Niospa Yōshi Sharapa eōnoa mato yoiāito, nikasharakāfe. Satanās mato chakafamapai. Fētsa Satanās nikayamaxō ea kachikiri faamano, nā ē kexesharaxii nā ēfe Epa israelifo kexesharani keskafakī. Shinākapo. Epa Niospa israelifāfe āto xinifo a piāifo ato ināni fonāikaifāfe afaa piamaifāfe Epa Niospa nai mēraxō ato pōtani oa misi keskarafo āfe ane mēnā nā pinōfo ato pōtapaoni pena tii ato noikī. Nāskafakīri nā ea chanīmara faafo ea Ifo sharakōi faifo ē ato ināxii ēfe Yōshi Shara isharapakexanōfo. Ea ōiyamafiaifono pena tii ē āto ōiti xafasharakōi faxotiro. Askatari mā ea Ifo sharafaifono isharakōiyanā mā ea chanīmara faino, akka ē mato ane fetsafaxōi tsōa tāpimisma, nā fiāi fisticī tāpitiro. Tokiri oxosharakōikī nā tokiriki mā

mātō ane kenea mātō ane fena ē mato ināxii. Nāskakē ea tāpisharakōixikani. Mā ōitisharayakōi ixii,” ixō Jesús anori ea yoia a chanīmara faafo Pérgamo anoāfo ē ato kenexonō.

Jesús a Tiatira anoāfo a Ifofamisfo ato yoini

18 Anā Jesús ea yoikī iskafaa: “Ea Ifofaāfo Tiatira anoāfo Niospa meka ato yoimis a ē yoipaiyai anori ē yoinō ea kirika kenexōfe iskafakī: ‘Ēkīa ē mātō Ifo Jesús ē mato yoisharapai mā tāpinō. Ēfe fero oa chii xoisai keskara. Nāskakē ē mato tāpikōia. Ēfe taeri nā keno fakka fakka ikai keskara. Nāskakē ē mato yoikī iskafai: 19 “Mē mato tāpia, nā mā afara shara famis. Mā nōinākōi. Askatari mā ea chanīmara faxō mā ea Ifokōi famis. Nāskakē fetsāfori mā noisharakōimis ato kexesharayanā. Mā omiskōifikī eōxō mā tenekōimis. Mā ea chanīmara fakī taefanitīa mā fetsafo sharafamis. Nāskakē iskaratīari mā ato noisharataifaa. 20 Mā mā askafimisno afara fetsa ē mato yoinō a ē fichipaiyaima mā anā fichipainōma. Akka kēro fisti mato fe ichanāxō, ‘Ē Niospa meka ē mato yoinō, ea nikakāfe,’ ixō mato yoipaikī, ēfe mekakōi mato yoima. Nā kēro Jezabel fanīrira mato yoikī āa mato pāramis. Mā Jesús Ifofafiamiskē mato pāramis iskafakī: ‘Mātō āfimafo chotakāfe; kērofāferi mātō fenemafo chotamakāfe,’ mato famis. Askatari mato yoimis iskafakī: ‘Afara fetsa yora fakaxō, nā nōko niosra ixō, a mā piāi ispaxō nōko nios nō ināira ixō, ano fisti ichanāxō, mā pitiro,’ ixō na kēro Jezabel mato yoikī mato pāramis. 21 A kēromā fanīrira mato yoimis mē yoitaifamis anā chakafanōma. Ē yoifiaitokai āfe chaka xatepaima. 22 Ē yoifiaino ea nikayamaito ōikī ē isinī imaxii rakatsax omiskōinō.

Askata a fetsafori a keskara a sharashināifoma āto chaka xateyamaifāfe ē ato omiskōimani. ²³A kēromā shināi keskarari shināifo ē ato retexi. Ē askafaito, ōikani a ea Ifofamisfo mai fetsafo arixō tāpitirofo ē keyokōi yorafo ē tāpisharakōia. Māto ōitini a mā shināi anori mē tāpikōia. Tsōakai afaa pishta ekeki onetiroma. Ē keyokōi tāpikōia. Nāskakē mā afafo shara famis ē mato shara faxii kopifakī. Akka a afafo chakafamisfo ē ato omiskōimaxii kopikiri. ²⁴Efe yora mīstichi Tiatira anoafāfe, mā atiri nā kēromā mato fanīra yoipaiyai anori mā nikamisma. Satanās ato tāpimamis keskara mā anori shināpaima. Askara shara. Nāskakē ē anā mato afaa fetsa yoima. ²⁵Nāskakē ē anā fistiri mato yoi. Na eōnoa mā tāpimis anori shināmakiyamakāfe. Ē mato ifiyoai mā eōnoa tāpimis anori shināmakiyaiyamakāfe. ²⁶⁻²⁸Fētsa Satanās finōkōixō, ea fisti Ifokōifaax mā naax nā efe nīpanaka. Ē ato xanīfo imaxii. Epa Niospa ea xanīfokōi ima keyokōi ē ato ikinō. Nāskarifikī ē ato xanīfo imatiro efeta na maitio anofo ato ikinōfo, mitsisipakōixō. Akka a fetsafāfe ēfe meka shara nikakaspaiifāfe nō ato omiskōimaxii. Oa nō kesho kerexkai nō yamī moshaino moshitiro keskara afeskaxō nō anā shara fatiroma. Nāskarifikī nā nikayospamisfo nō ato omiskōimanaitīa tsoa pishta ato timamatiroma nanōfoma. Mā penaino, fishifā fisti fafeaito, keyokōichi yorafāfe ōitirofo. Aa keskara ē anā oxii ea ōisharanōfo. Ē anā nokoxō, ē ato yoixii nā ea Ifofamisfo efe isharapakexanōfo. ²⁹Mā pachoyakī ea nikasharakāfe. Niospa Yōshi Sharapa mato yoiai keskara nikasharakāfe, ” ” ixō Jesús anori ea yoia a Ifofoafo Tiatira anofo ē ato kenexonō.

Jesús Sardis anofo a chanimara fafo yoini

3 ¹Askata anā Jesús ea yoia iskafakī: “A ea Ifofamisfo Sardis anofo a ato Niospa meka yoimis a ē yoipaiyai anori ē yoinō ea kirika kenexōfe iskafakī: ‘Ēkīa māto Ifo Jesús ē mato yoi mā tāpinō. Niospa Yōshi Shara efe ika. Ēfi Nios yoimisfāfe āto xanīfokōiki. Ē mato yoi iskafakī: Mā ika keskara mē tāpimis. Yorafāfe matoōnoa iskafakī yoimisfo: “Nafō shara ikafo. Na Sardis anoafāfe mā Jesús Ifofakōinafo,” ixō matoōnoa yoimisfo. Mā isharamis keskara ōikani. Māri shināmis iskafakī: “Nō shara ikara” ifiax mā shara ikama. Mā ea Ifofasharakōiama. ²Akka mā mā ea shināmakia. Askakakīma, anā a mā shināyopaoni anori shinākāfe. Mē tāpia Epa Niospa mato imapaiyai keskara mā isharakōiama. Ē mato yoiai keskara mā akama. Mā eōxō asharayopaoni anā iskaratīa mā anā askafaima. Mā ea shināmakipai. Nāskakē afianā ea shināsharainīfofākāfe. ³Nā mā ēfe meka māto ōiti mēra mā shināyopaoni keskafakī anā shinākāfe. A mā chakafamis keskara shinākakima; ea Ifo shara fakāfe. Akka mā ea shināyamaito ē matoki samama nokorisatiro mato omiskōimaxiki. Oa yometso tsōa tāpimano āto pexe mēra ikirisatiro keskai, ē matoki nokorisataxii mato omiskōimaxiki. ⁴Askafiax a mato fe ichanāmisfo fisti rasi a Sardis ano ikafāfe chakafamisfoma. Nōko rapati choshatakōi nō pekaxō fatiro fetsa fena shara safexiki. Nāskafakīri atirito mā chaka shināpaoni keskara mā anā shināima, mā mā pota. Nāskaxō mēstekōi mā eōnoa shināi. Nāskaxō rapati fenasharakōi keskara ē mato ōitiro. Mā askano, mā ea ano nokoaito ē mato rapati oxokōi sharakōi ināxii mā

efe ĩpaxanō. Mā isharakōimixakī mā efe rafepakenaka. Nā ē keskara shara ixikākī. ⁵Tsoa ēfe meka shināmakitama ea Ifofakaxō, eōxō Satanás finōkanax afo efe isharakōipakenakafo. Afori ē ato rapati oxokōi sharakōi ināxii.

Askaiġāferi ēfe Epa Niospa a ea Ifofaafō tii āto ane tii kirikaki kenea. Nāskaxō āto ane kenea kirikaki a ea Ifofaiġāfe tāpinōfo efe nġpaxakākī. Askaiġāfe ē āto ane soanakama. Epa Nios feta āfe āġirifāfe ōiaifono ē ato yoixii iskafakī: “Nafofi efe yorafokī,” ixō ē ato yoixii. ⁶Mā pachoyakī ea nikasharakāfe. Niospa Yōshi Sharaōxō eōnoa a ea Ifofaafāfe yoiāito nikasharakōikāfe,” ixō anori ea Jesús yoiā a Ifofaafō Sardis anoāfo ē ato kenexonō.

Jesús Filadelfia anoāfo a chanġmara faafō yoini

⁷Askata anā Jesús ea yoiā iskafakī: “A ea Ifofaafō Filadelfia anoāfo a ato Niospa meka yoimis a ē yoinō ea kirika kenexōfe iskafakī: ‘Ēkġā mātō Ifo Jesús ē mato yoi mā tāpinō. Ē afaa pishta chakafamisma. Ē sharafinakōia. Ēfe meka chanġmakōi. Nā fichipaiyai afama mġshti sharafo āfe pexe ano fapaoni, xanġfo David. Akka āfe pexe fepti chamisyano tsoa ikitiroma ipaoni, chamismaisax. Akka ato ikimanaino ikitirofo. Akka ato ikimayamaino tsoa ikitiroma. Nāskarari mā Nios ano ikipai mā ikitiroma ē mato ikimayamaino ėmāi chamis keskaraxō. Akka ē mato ikimanaino mā ikitiro Nios ano. Akka fetsafāfe ikikāfe mato faifono mā Nios ano ikitiroma. Eres fistichi ē mato ikimatiro. ⁸A mā imis keskara mē tāpia. Mā yora ichapayamafġaxō mā shināsharakōimis. A ē yoimis keskara mā ato tāpimatiro a mā amis keskara eōnoa. A ē yoimis anori tsōa mato xġtitiroma. Yora fetsafāfe mato yoiāifo

mā metsanima. Mato askafafiaifono ēfe meka mā shināmakimisma. “Na Jesús nōko Ifo,” mā ea famis. ⁹Fetsafāfe chanġkakī mato yoimisfo iskafakī: “Nō judeofo,” ixō mato yoimisfo. Afokai Niospa afe yorafoma, Epa Nios chanġmara faxoma. Afāfe Satanás ifofamisfo. Nāskakē ēfe Epa fe nō āto kaifoma. Afofi āa chanġmisfo. Shinākāfe. Nā yorafo ē ato yoimaxii iskafakī yoinōfo: “Nōkai shara shināima. Nō afama. Chanġma, Niospa āfe Fake mato noisharakōimis,” ratokonō mai chachikaxō iskafakī mato yoixikani. ¹⁰A ē mato yoimis anori mā isharakōia omiskōifikī mā tenekōimis ēfe meka nikakatsaxakī. Mā eōnoax omiskōifikī mā tenekōimis. Nāskakē mā ea shināmakimismano ē mato kexesharaxii a omiskōiai nokoaino nā maitio. Keyokōi omiskōixikani ea Ifofayamakanax. ¹¹Ē anā samama oxii matoki. Ea shināmakiyamakāfe. Mā ea Ifofakī ea chaifayamakāfe. Mā ea chaifayamaino eōxō Epa Niospa mato ināpaiyai keskara mato ināi fetsafāfe finōfoma. ¹²Fetsa omiskōikī ēfe meka shināmakitama tenekōifai ea Ifo sharakōi faxō ato Satanás finōkōia. Nāskakē a ēfe Epa Nios ika ano, ē ato imasharapakenaka. Anoax anā faki fonakafoma. Nāskakē ē afo tāpimaxii afomāi Epa Niospa yorafokē. Askaxō ē ato yoixii iskafakī: “Nono Epa Nios ikano, nofe mā ipanaka,” ē ato faxii. A Niospa yorafo, judeofo, Jerusalén ano ipaonifo. Akka iskaratġa Epa Nios ika ari Jerusalén fena. Jerusalén fena nai mēra. Nai mēra ifġax, chipo nāmā fotoxii. Akka fetsafo ea shināmakikanaxma afo ano ipanakafo. Nāskakē fotoxō ēfe Epa ane ē atokī nētaxii. Askatari Jerusalén ēfe ane fenari tsōa nikayomisma ē atokī nētaxii keyokōichi tāpinōfo ē āto Ifokē.

¹³Mā pachoyakī ea nikasharakōikāfe. A Niospa Yōshi Sharapa ato shināmanaino yoiaifo anori nikasharakōikāfe,” ixō Jesús ea anori yoia a Ifofafo Filadelfia anofo ē ato kenexonō.

**Jesús Laodicea anofo a
chanimara faafo ato yoini**

¹⁴Askata anā Jesús ea yoia iskafakī: “A ea Ifofafo Laodicea anofo a ato Niospa meka yoimis a ē yoipaiyai anori ē yoinō ea kirika kenexōfe iskafakī: ‘Ēkīa mātō Ifo Jesús ē mato yoi mā tāpinō. Epa Niospa ea amapaiyai keskara ē fakatsaxakī āfe meka yoinō. Epa Niospa yoipaiyai keskara ē keyokōi yoimis. Ē chanikima yoimis. Epa Niospa onifani tii keyokōi ēfi āto xanifokōikī. Ē mato iskafakī yoi: ¹⁵⁻¹⁶Mā amis keskara mē tāpia. Ea kachikiri fayamakaxō akka askafixō ē mato amapaiyai keskara mā fichipaikōiama. Askara sharama. Afara matsishara nō nīskakī nō inimayanā nō ayatiro. Askatari afara xana shara mā matsikē nō inimayanā ayatiro. Askafixokai afara katsa nō inimayanā ayatiroma. Katsa meei nō anāpaketiro. Nāskarifiāi ranāri yorafo afara xana keskarafo. Ea Ifo sharakōi faafo. Akka ranāri afara matsi keskarafo. Ēfe meka tāpisharafoma. Ē atoōnoax rafañā ikōini. Askafixakai mā kai xana yafi matsi keskarama. Mā katsa keskara. Afara katsa meekī nō anāpaketiro keskara ēri mato askafai. Nāskakē ē mato potaxii oa ē anāpakeai keskafakī. ¹⁷Akka mā yoimis iskafakī: “Ē afara ichapaya. Ē afaa yopaima. Ē Niospa mekari tāpifinakōia,” ixō, anori mā yoifixā mā tāpiama mā chaka imis. Ooa. Ea mā yopafikī mā kakapaimis. Niospa āfe Yōshi Sharapa mato imapaiyai keskara mā ikama. Mā katsa keskarakī. Mā imis keskara mē tāpia. Akka ēkai askara fichipaima. Askafixō ē matoōnoa

shināi keskara mā kai tāpiama. Mā nā fēxo keskarafo. Fēxo afara ōitiroma. Nāskarifiāi māri ēfe mekakōi nikasharamisma. Mā yora chitoria keskarafo. Akka mā tāpiama mā chitoria keskara. Yora chitoriato rapati yopai chitoria ixikima. Nāskarifiakī mā ea yopaima keskara ea yopafikī. ¹⁸Akka ē mato yoisharapai mā afara chakafamis keskara mā anā anōma. Ea yōkakāfe ē mato tāpimanō afesax mā ea keskara itiomākī. Eres fisti ē mato imasharatiro. Akka mā chitoria keskara. Akka ē mato rapati safemasharatiro mā anā rāfinōma. Akka rapati ē mato yoitamaroko mā afara chakafamis ē mato yoi. Akka ē mātō ōiti fetsafaxotiro ea keskara shara mā inō. Akka a afara mā chakafamis ē xafakīa ōia. Mā fēxo keskarakōi imis. Nāskakē ea yōkakāfe ē mato shara fanō, ēfe meka ē mato tāpimasharanō. ¹⁹Akka ē mato noiyamakī ē anori mato yoikeranama. Askatamaroko ē mato keyokōi noikōi. Nāskakē ē mato omiskōimatiro tāpimakī mā chaka xatenō. Nāskaxō nāfori ē ato yoisharapai ea Ifo shara fanōfo. Akka a mā chaka shināmis keskara anā shināyamakāfe. Iskaratīa ēfe meka nikakōikāfe ē mato yoia keskara axikakī mātō chaka xatekāfe. ²⁰Shinākapo efe yora mīstichi. Akka a yora pexe mēra ikipaiikī ikisi pexe ifo kenatoshitiro pexe ifāfe ikimanō. Nāskarifiāi ē mato ano nokoxō mato yoikī iskafaxii: “Ē mefe rafepai,” ixō ē mato yoimis. Fētsa āfe shinā mēraxō ea nikaxō ea yoi: “Ifo, emēra ikife. Ē mia fichipai,” ixō anori yoiaito ē a mēra ikiax ē afe rafei. Ari efe rafei. ²¹Fētsa afara chakafakī xatexō ea Ifosharafai nā ēfe Epa Nios ika ano efe ipasharatiro. Nāato Satanás finōa. Ēfi xanifokōikī ari efe xanifo itiro. Ē Satanás yafi niáfaka chakafo finōkōia. Ēfe Epa Nios ika ano

afe xanīfokōi ē ika. Nāskarīfiai fētsa āfe chaka kachikiri fakī, ea Ifosharafaxii ē ika anoax ari efe xanīfo ipaxatiro. ²²Mā pachoyakī ea nikakāfe. Niospa Yōshi Sharapa ea yoiai keskara nikasharakāfe, ’ixō ea anori Jesús yoia a Ifoafafo Laodicea anoafō ē ato kenexonō.

4 ¹Akka nā ea taefakī yoia, mē kenekī mitoano, ea anā yoiaito ē nika. Ea iskafaito ē anā ōia nai mēraxō oa pexe fepoti fepekemea keskaraxō. Ē nika afia ē nika keskara xāaiti āfe oi efapa keskarato ea yoia anā ea iskafakī: “Niri ekeki māpeferafe,” ea faa. Oa namakē ōia keskara ē ōia ea iskafaito: “Nafō ē mia ispanō nafō afarafo chipo ixiaifo ē mia ispanō,” ea faa.

²Ea askafaito samama Niospa Yōshi Sharapa ea ōimana āfe tsaoti efapa sharakōi ea ōimana a xanīfāfe tsaoti ano tsaokē ē ōia. ³A ē ōimismafo ē ōia sharakōifo. Nāskakē ē tāpia. Nioskōiromē ē faa. Askaito ē ōia fafesharakōiaito. Iskara ē ōia. Tokiri rafe āto ane jaspe fe cornālinā nā rafesharakōi fakka fakka sakōini. Nāskara āfe femānā ē ōia. A āfe tsaoti ano oa nāfa fai nana keskara ē ōia fafesharakōiaito. ⁴Nā nōko Ifo tsoao ano a kematai veinticuatro tsaotifo ē ōia. A tsaoti kamaki feronāfakefo tsoafo ikafo. Nā feronāfakefo Jesús Ifofamisfo ikafo. Afāfe nā ato chanīmara faifo ato kexemisfo ipaonifo. Āto rapati oxo sharakōifo māmāi ato Niospa āfe chaka soaxonikē. Askatari xanīfāfe maiti keskara oro sharakōi safeafo ika. ⁵A āfe tsaoti anoax kana peeitaitani oa kana piishikai keskara a mēranōa ē nika. A fesoa anori siete rāpari xofisaito ē ōia. A ē ōiaino Epa Niospa ea shināmana iskafakī: “A Epa Nios tsoano rāpari otaito ē ōia keskara, nāskarīfakī Epa Niospa āfe Yōshi Shara nokoki nīchiarokomē nofe rafenō,” ixō ē shinā.

⁶Askatari a fesoa anori oa fakafā keskara fakka fakka ikaito ē ōia, oke mēra xafakīakōi ika. Askatari a nōko Ifāfe āfe tsaoti ano a onifanifo cuatro ano niafo ika. Askai fero ichapayafō. Takairafe fero neeafo. ⁷Oa poomā femānā keskara fetsa ita, fetsari oa fakka fene femānā keskara ita, fetsari oa yōra femānā keskara ita, fetsari oa tete yoyai keskara ika. ⁸Askakani āto pei ichapa seis ika, fisti rasi pei ichapayafō. Askai āto fero rasi ato neei fetsea ika. Penachāi fanāita, fakishchāiri fanāiki xatepakenakafoma. Fanāiyanā iskafakani:

Sharafinakōia, sharafinakōia, sharafinakōia, nōko Nios sharafinakōi. Nōko Niospa afama mīшти famis nā apaiyaifo. Epa Nios niyopaofinixakī, nāskakē iskaratīa nia. Askatari Epa Nios afeska pishta nakama, ikax fanāikaifo.

⁹⁻¹⁰Nāskakē aōnoax fanāikafo iskakani: “Epa Niosi, mī fisti nōko Ifo. Fato fetsakai na mī ikai keskarama. Mīfi nīsharapakenakaki. Mī sharakōi. Mī afaa pishta chakafamisma. Mī askaito nō mia Ifofasharakōi. Aicho Epa Niosi. Fato fetsakai mia keskarama,” ixō Nios fanākafo. Mā askafono nā Jesús Ifofamisfo veinticuatro xanīfofo nōko Ifo Nios āfe tsaotiki tsoano a nāmā feopakefofānafo. Feopakefofākata, āto maiti tsekakata feofafo Nios nāmā māmāi askafakatsaxakakī. Nāskaxō yoiafo iskafakakī: “Nōko Ifo Nios mī noko maiti inā keskari fakī nōri miari mini. Mī noko ināfikē nō mia fāsi noikī na maitifo nō mia mini. Meres fisti mī noko ikitiro. Mī noko ifimis. Akka mī nōko Ifokōi itiro. ¹¹Mī afaa chakafatamaroko mī sharakōifamis. Akka mīōnoa fisti nō yoitiro iskafakī: Mī nōko Ifokōi. Mī nōko Nios.

Tsoa fetsakai mia keskarama shara.

Mī isharapakenaka. Mīkai afaa chakafamisma. Nāskakē nō mia fāsi noi. Mī shināmās mī afama mīshti fatiro. Mī keyokōi onifani. Mī apaiyai keskara mī keyokōi onifani ato nimapakexakī,”

ixō nā Jesús Ifofamisfāfe veinticuatro xanīfofofāfe yoisifso.

Jesús kirika kataramea tsomaxō ato yoiyoni afeskaximākai chipo

5 ¹Askata ē anā ōia oa ēfe namapa ōia keskara nā ē mato yoinō. Nā mifi kayakai aōri nōko Ifo Nios tsaono ē ōia kirika kataramea takai rafe kenea ē ōia, siete taxtati aō neekē. ²Niospa ājiri finasharakōia ē ōia. Fāsikōi mekayanā iskafakī yoi: “Na kirika taxtatini taxta afeskaxō tsōa ōitiroma. Nā xanīfo afaa chakafamisma fistichi fēpetiro ōixii. ¿Fato xanīfāfe afaa chakafamismato fēpetiromē nō ōinō?” ixō yoi.

³Askafixō tsōa fēpetiroma nai mēranoa ikafāferi fēpetirofoma. Askatari a nāmā ikafāferi, Niospa ājirifāferi fēpetirofoma a mēra ōixikakī.

⁴Nāskakē ē oiai finakōiyanā iskafakī yoi: “iOoa! Xanīfo afaa chakafamisma tsōa fichiama na kirika noko fēpexopanā a mēra nō ōipanā,” ixō ē shinā. ⁵Askata nā veinticuatro xanīfofofāfe Jesús Ifofamis fētsa ea iskafaa: “Oiyamafe. Ōipo. Nōko Ifo oa ono nia. Cristo fisti nōko xanīfo finakōi. Afama mīshti atiro. Tsoa a keskarakōima. Nōko xinifāfe āto xanīfo ipaoni David āfe fena Jesús. David xanīfo finakōia ipaofinikē, Jesús finōkōia. Keyokōi ato finōa. Satanás finōta, a xanīfo fetsafori ato finōkōia Jesús. Iskaratīa nono Epa Nios fe ika. Nāskakē na siete taxtati Jesús noko fēpexotiro nā kirika nō ōinō. Nāskakē anā oiyamafe,” ea faa.

⁶Nāskakē nānoa ovejanā fake ē ōia āfe māxo sieteya, āfe ferori nāskara ika. Reteafo keskarafix Niospa tsaoti ano nia ika. Nānoa nā Niospa onifani cuatrofo feta a veinticuatro Nios Ifofafo xanīfofofāfe foaketefayakenafo ika. Tsoa fetsakai a keskarama. Nāto afama mīshti fatiro. Nā fero sietefāfe noko shināmani Niospa āfe Yōshi Shara nīchiano keyokōi nā maitio ano inō.

⁷Akka Epa Niospa nā kirika āfe mifi kayakai aōri tsomakē Jesús fia. ⁸Fixō tsomano nā cuatro Niospa onifanifo fe nā veinticuatro xanīfofo Jesús Ifofamisfo a nāmā feopakefofānafo. Nāfāfe maneti yafi kechofo tsomafo. Nā kechofo oro fakka fakka ikai keskara mēranoax otano āfe kōi nofe nakas shara nai mēra foai keskara. Nāskarifiāi nā Nios Ifofamisfāfe kifiaifono Epa Niospa nikamis. ⁹⁻¹⁰Akka nā fanāikaifo tsōa nikayomisma fanāikani, iskakani:

Mī afaa chakafayamafiamiskē mia retenifo. Mī noko nāxoni, mī imi foni Satanás anā nōko ifo inōma Epa Nios āfe fakefo nō inō. Nāskakē mī fistichi fitiro kirika kenea fēpexiki noko tāpimaxiki. Mīōnoax nā mia chanīmara faafo tii maifo tii anofo Niospa yora itirofo meka fetsa fetsatapafāfe mekakani. Nāskakē nāfāferi fetsafo mī meka shara ato tāpimanano, mī ato amapaiyai keskara anōfo. Askatari nā maifo tii anofo xanīfo mefe ixikani, ikax fanāikafo.

¹¹Askatari ē ōia Niospa ājirifo ichapakōifo tsōa ato tanatiroma ichapakōi fanāikaifāfe ē ato nika. Nios xanīfo tsaoti ano nā Niospa onifaa cuatrofo fe nā xanīfofo veinticuatrofo feta nakifayakenafo. ¹²Fāsikōi fanāikani iskafo:

Niospa Fake Jesús oveja fake keskara yorafo nāxōa āto chaka

soaxoxikī. Akka keyokōi nā maitio anoafō ato īkitiro, keyokōi nai mēranoafori ato īkitiro, nōko mai anoafori āfenā, keyokōi tāpikōiakī, afama mīshti atiro, keyokōichi mī sharakōira fapanakafo. Mī fisti nōko Ifo itiro. Aicho, mī nōko Ifo mī isharakatsaxakī mī nīpanakara, ikax fanāikafo.

¹³Askata ē nika keyokōi nai mēranoafō tii fanāikaifono, mai anoafori fanāikaifono ē nika. Mai mēranoafori ē nika. Fakafā anoafori fanāikaifono iskakani:

Epa Nios āfe tsaoti ano tsaofa, āfe Fake Jesús oveja fake keskara, nā rafe nōko Ifo isharakōimisfo. Keyokōichi mā sharakōira ato fapanakafo. Mares fisti mā nōko Ifo itiro. Mā afama mīshti atiro. Nāskara mā īpanaka, ikanax fanāikafo.

¹⁴Askatari nā cuatro Niospa onifafāfe yoiafo iskafakakī: “iAicho! Askapainōra,” fata, nā veinticuatro xanīfofo Nios nāmā feopakefōfānafo. Afāferi Epa Nios yafi Jesús yoisharakani.

Nā siete taxtati

6¹Nāskata ē namakē ōiai keskara ē anā ōia. Jesús oveja fake keskara nāato noko nāxoni nāato nā kirika āfe taxtati fisti fēpeaito ē ōia. Fēpeaino ē nika nā cuatro Nios onifaa fetsa fāsikōi mekaito nai tiri ikai keskara: “Niri ofe,” ikaito.

²Askaino kamayo oxo chaima nia ē ōia. Nā kamayo kamaki fētsa kati tsofax tsaofano xanīfāfe maiti Niospa maimana. Nānoax kamayonō kaa fetsafo īkipai xanīfo ixiki. Tsofa pishtakai nētefatiroma.

³Askata Jesús anā kirika taxtati fetsa fēpea. Fēpeaino nā cuatro Niospa onifani fetsa ē nika iskaito: “Niri ofe,” ikaito.

⁴Nāskafaino kamayo fetsari ōshi nokotoshia. Nā kamayo kamaki tsaofa fetsari ē ōia. Keno chainipa Niospa inā aya katanō maifo tii anoafō ato shināmatanō anā isharanōfoma noikaspa faatanākanax retenānōfo.

⁵Askatafata Jesús anā kirika taxtati fetsa fēpea. Fēpeaino nā cuatro Nios onifaa fetsa ē nika iskafakī yoiaito: “Niri ofe,” ikaito. Anori yoiano kamayo fetsa fisokōi nokotoshiaito ē ōia. A kamaki tsaofa aō kilo tanati tsofax. ⁶Nā cuatro Niospa onifani anoax mekaito ē āfe meka nika iskaito: “Kori texe fayamanō, feronāfāke pena fisti yonoxō kori fixō trigo kilo fisti fikī kopifatiro. Askayamakī tres kilo xiki fitiro. Kori texefayamaxō afaa fetsa fitiroma. Nāskakē xini yafi nā uva fimi ene chakanafayamafe. Akka mā texefayamax mā fonāiki omiskōixii,” ixō yoia.

⁷Askata Jesús anā kirika āfe taxtati fetsa fēpea. Fēpeaino ē nika na cuatro Nios onifani fetsa, “Niri ofe,” ikaito.

⁸Anori askafaino kamayo fetsa pāshikōi nokotoshiaito ē ōia. Nā kamayo kamaki fetsa tsaofa ika āfe ane Ato Namamis. Nāato yorafo namatiro. “Ē yorafo namapaira,” faito, “Ēje. Mī ato namatiro,” Niospa faa. Askafaito nā ato namamisto yora fetsafoya ato retenāmai. Akka atiri ato fonī namai, atiri pae fetsa fetsatapafāfe ato namaxii, atiri yoinā pōfefāfe ato yokakani. Akka yora kayakōi ato namaxiai ē ōia tsōa ato tanātiriroma.

⁹⁻¹⁰Nāskata Jesús āfe kirika taxtamea anā fēpea. Fēpeaino nā Niospa meka ato yoiofāsafaifono fetsafāfe ato retefinifono mā otoafō ē ōia. Epa Nios kīfiti mīsa ano nā Jesúsnoax nanifo āto fero mēshofo ichanākanax fāsikōi mekaito ē nika iskai mekaifono: “Nōko Ifo Nios, mī keyokōi tāpikōia. Mī afama

mīshiti fatiro. Mī shara famis. Mīkai afaa chakafayomisma. Mī chanīmakōi. Nā mia chanīmara faafāfema mai anoafāfe noko retemisfo. Nāskakē, ĉafetīa mī ato kopimē omiskōimaki?” ixō yoiaifāfe ē nika. ¹¹Nāskakē nōko Ifāfe yoia isfaki: “Manayokāfe. Fena fena kakīma. Fetsafori mato keskarafori eōxō yonomisfo ixikani. Nāfori eōxō nā yora chakafāfe ato retexikani. Akka mā ato retekī mitoafono mā nakanax mato ano nokoxikani keyokōi. Nāskakē nā ato retemisfo ē ato kopixii ato omiskōimaki omiskōipakenakafo mēra ē ato potaxii afaramāi chakafamisfokē,” ixō nōko Ifo ato yoia. Ato yoita rapati oxosharakōi chainipa ato inā, nāfāfemāi taeyoi nikanifono nā Epa Nios Ifofasharamisfo tii ato inā.

¹²Askata Jesús anā kirika āfe taxtati fetsa fēpeaito ē ōia. Fēpeaino fāsikōi mai naya naya ika. Xini anā pee iyamaino, rapati fisokōichi fepoa keskara ika, fakishkōi. Oxeri ōshikōi imi keskara ika. ¹³Oa nefe kerexepato nokoki nefekī fana fimi yome mīshiti niriatiro keskara. Nāskarīfai fishifo nai mēranoax mai ano pakei fetsea.

¹⁴Askatari nai kataramēake kafākē ē anā ōiama. Māchifā fe mai toomāfā mai naya naya ikaino, anā ano ikama.

¹⁵Nāskakē keyokōi mai anoafo ratekōiafo. Yorafāfe āto xanīfori sorarofāfe āto xanīfori ratekōiafo; afama mīshitiyafori, yora mitsisipafori, āto yonomatifori, fetsafori ifomaisfori keyokōi nāfo ratekōiafo. A tiiri mafa kini mēra ikiafo. A tiiri māchi keya ano ichoafō tokirinīfā nāmā oneafo.

¹⁶⁻¹⁷Askata fiisikafo iskayanā: “iOoa! Epa Nios nai mēra ikato āfe Fake Jesús fe iskaratīa nokoki ōitifishkikōina. ĉNō afeskatiromē omiskōiyamaxiki? Tsōakai Nios timamatiroma noko omiskōimayamanō. Nā māchi keya anoa

tokirinīfā nokoki pakepainō Niospa noko fichinōma nō omiskōinōma,” ixō nā nikakaspamisfāfe yoiafo.

Niospa ciento cuarenta y cuatro mil afe yorafo kexexii

7 ¹Nāskata ē anā ōia oa ēfe namapa ōia keskara nā ē mato yoinō. Niospa āfe ājiri cuatro afe nai mēra imisfo ē ōia. Fetsa xini oaikiri nia, fetsa xini kaikiri nia, fetsa xini oaima anori nia, fetsa xini kaima anori nia. Askano nefe nishpapakekafana. Nefe nishpapakekafanaino keyokōi maifo tii anoa nii peifo takka takka ikama. Fakafāri anā poo ikama. ²Nā cuatro Niospa ato yoiaito mai yafi fakafā chakafatirofo. Askata Epa Nios nipanakato āfe ājiri fetsa ē ōia xini oaikirinoax oaito, nōko Epa Nios āfe marakka fati feaito, a afe yorafo aō marakka faxii keyokōichi tāpinōfo Niospa afe yorafokē. Nā Niospa ājiri okī nā cuatro Niospa ājiri fetsafori fāsikōi ato yoia iskafaki: ³“Manayokāfe, nā Nios Ifofamisfo ikisi āto femānāki āfe anefo keneyonō nāfāfe Nios yonoxomisfoki keyokōichi tāpinōfo. Nāskakē fena ato chakana fayamakāfe. Mai anoafo fakafā anoafori, ififo ato chakana fayamakāfe. Chipō ato axikakī,” ixō ato yoia.

⁴Akka ē nika mā Niospa ājirinī mā ato marakka faano ciento cuarenta y cuatro mil judeofāfe femānāki. ⁵⁻⁸Nōko xini Israel āfe fakefo feronāfakefo doce inifo. Ato iyoakōichi āfe ane Judā āfe pefeta Rubén. Rubén āfe pefeta Gad. Gad āfe pefeta Aser. Aser āfe pefeta Neftalí. Neftalí āfe pefeta Manasés. Manasés āfe pefeta Simeón. Simeón āfe pefeta Leví. Leví āfe pefeta Isacar. Isacar āfe pefeta Zabulón. Zabulón āfe pefeta José. José āfe pefeta ato chipo fakekōi Benjamín. Nā doce feronāfake

fisti rasi paxkakanax mā kaiafono nā doce feronāfake anoa Niospa ato katonī. Fetsa anoa doce mil faxō ifita, fetsa anoari doce mil faxō ifini. Nāato askafakī fetsa doce mil faxō ato ifiketsani. Nāskakē mā afo yosikanax ciento cuarenta y cuatro mil inifo.

Yorafā rasikōichi rapati oxokōi safeafo

⁹Askata Epa Nios fe āfe Fake Jesús nā oveja fake keskara nā tsoafo ano yorafā rasi niafo tsōa ato tanatiroma. Nā maitio anoafo fisti rasi anoafo, xoko fetsafo, meka fetsayafo ikafo, rapati oxokōi chainipa safeafo ē ōia fisti rasichi epe pei tsomafāfe. ¹⁰Nāfāfe fāsikōi yoiāfo iskafakakī:

Nōko Epa Nios feta āfe Fake Jesús noko ifimis nōko Ifo Jesús oveja fake keskara nokoŋoax nani nōko chaka noko soaxoxikī nō afe nīpaxanō, ixō yoiāfo. ¹¹⁻¹²Nāskata nōko Ifo xanīfāfe tsaoti ano tsoano āfe ājirifāfe foaketi fayakenafo ikafo. Nāskakē nā veinticuatro xanīfofo fe nā Niospa onifanifo cuatrofo nōko Ifo tsoano tsoafo ikafo. Nāskafono nā ājirifo nā nōko Ifo tsoano ratokonō mai chachipakefofākanax feopakefofānafo Nios yoisharakakī iskafakakī:

¡Aicho! Chanīmakōi, meres fisti mī isharpakemis. Meres fisti nokori mī imasharatiro. Mī keyokōi tāpia. ¡Aicho! Nā nō yopai keskara mī noko axomis. Keyokōichi sharakōi mia fapanakafo. Mī afama mīshti fatiro. Mī nāskapakenaka. Nāskaroko anōkī, ixō yoiāfo.

¹³Nāskata nānoa xanīfo fētsa ea yōka: “¿Na yorafo rapati oxo chainipa safeafo tsoamē? ¿Fakiax feafomē, mī tāpiamē?” ixō ea yōka. ¹⁴“Maa. Ēkai tāpiana. Mī tāpia. Mī ea yoitiro,” ē faito ea yoiā iskafakakī: “Yorafo omiskōiaifono na yorafori fāsi omiskōinifo. Akka

omiskōiaifono Niospa āfe Fāke Jesús ato nāxoni āto chaka ato soaxoxiki. Ato chaka soaxō mā ato imasharakōia. Nāskakē ato rapati oxo shara safemana. ¹⁵Nāskakē Epa Nios ano iskaratīa afe ikafo. Epa Niospa ato yonomana keskara axopakenakafo. Nāskakē ato kexefafāini afara chaka atoki nokoyamanō. ¹⁶⁻¹⁷Niospa āfe Fake Jesús Epa Nios fe imis. Nāato ato kexepakenaka. Nāskakē anā fonāitama, anā nomipakenakafoma. Xinīri anā ato pipanakama. Jesús ato kexeaino inimapakenakafo. Epa Niospa āto ōiti ato fepeaxoxii anā oianōfoma,” ixō ea yoiā.

Nā taxtati mā keyoaino Jesús fēpea

8 ¹Mā kirika āfe taxtati keyoaino Jesús fēpeaito ē ōia namakē ōiai keskara. Nā seis taxtati taefakī fēpeyao. Akka iskaratīari fetsari fēpea mā keyoaino. Fēpeano Nios ika ano nai mēranoax keyokōi nishparakafo. Media hora nishparakayofo. ²Nishparakaifono ē ōia Niospa āfe ājirifo siete a ketaxamei niafāfe, nāfāfe Niospa ato yoimis keskara anōfo. Niospa ato tii maneti inā nā ato yoiāitīa āto maneti chāi chāisafanōfo. ³Askata Niospa ājiri fētsa sapa oro fakka fakka ikai keskara tsomax Epa Nios kīfiti ano nia ē ōia. Akka fētsa sapa kamaki nakas otaxō naneaito ē ōia. Nāskaxō Nios kīfiti mīsa ano oro kamaki sapa faa. ⁴Askano āfe kōi nakas shara nai mēra foa āfe mifi kamaki sapa tsoano. Nāskarīfiai Niospa yorafāfe kīfiaifono Epa Nios ika ari nokoaito nikatiro. ⁵Akka ē anā ōia Epa Niospa āfe ājiri yoiaino, mīsa kamakinoa chii fixō āfe sapa kamaki chii fospi faa. Fospi fata nai mēraxō mai ano pota. Askaino mai anoax nai fāsikōi tiiri ika pachakōi ika, kanari piishika mairi naya naya ika. Nāskakē nā

chanĩmara faafoma tii ato omiskõimaxii.

Ājirifāfe maneti chāi chāisafafo

⁶Askata Niospa āfe ājirifāfe siete nā manetifo Niospa ato tii inā itipinĩsharafafo chāi chāisafaxikāki.

⁷Askata fētsa āfe maneti chāi chāisafaino faka matsi tokoro efapafo imia osia nai mēranoax keyopakea. Chiiri imiya osia nai mēranoax mai ano pakea. Māifā kaxke fetsa koofi keyoa ififoya. Akka ranāri texea. Akka fasifo kooi keyokōia.

⁸Askata Niospa ājiri fētsa āfe manetiri chāi chāisafaino machi efapa chii xoisai keskara Niospa nai mēraxō nāmā pota. Fakafā mēra pakea. Askaino fakafā kaxke fetsa imi keskara ika. ⁹Nāskakē fakafā mēranoax fafiffo ranāri naafo. Askatari kanōanāfāfori ranāri kooafo.

¹⁰Askata Niospa ājiri fētsa atori āfe maneti chāi chāisafaino fishi efapakōi xofisa chii keskara nai mēranoax pakea fakafa mēra. Akka faka fetsafo mērari pakeama. Askatari faka poyo poyo ikai ano pakea. ¹¹Nā fishifā āfe ane Mokara famisfo. Nā fishi faka mēra pakeano, faka moka paekōi ika. Nāskakē nā faka ayakanax yorafo ranāri nai fetseafō.

¹²Askatari Niospa ājiri fētsa āfe manetiri chāi chāisafaino xinī anā chaxasharama. Ōxeri anā chaxasharama. Askatari fishifāferi anā ranārito chaxasharama. Nāskakē penafekē tsōa anā ōisharatiroma. Fakish finakōia ika. Tsōa askara fakish ōiyomisma.

¹³Ē nāfo ōiaino tetepafā keskara keya yoyaito ē nika. Fāsikōi mekayanā yoya iskafakī: “iOoa! Yorafāfe Nios nikakaspakanax omiskõikani finakõixikani. Niospa ājiri tres fetsafāfe āto maneti chāi chāisafaifono mai ano ikafo omiskõifinaxikani,” ixō tetepafā keskarato yoya.

9 ¹Askatari Niospa ājiri fētsa āfe maneti chāi chāisafaino nai mēranoax oa fishi keskara nāmā pakeaito ē ōia. Nāskata nā niafaka chakafo kinifā fakishifā mēra ikafo ano kaa. Nā kinifā fepotiya. A mēranoaxkai kaitirofoma. Akka nā nai mēranoax nāmā pakea Niospa chavis inā aato kinifā fakishifā mēranoa ato kāimanō. ²Fēpeaino mafa kinifā mēranoax kōinifā nai mēra foa. Nāskakē xinī chaxasharama. Nai fakishkōi ika. ³Askata nā kōinifā mēranoax kōketsere keskara ichapa rasi mai ano fotoa. Niospa ato pōfekōi ima nifo keskara inōfo. ⁴⁻⁵Ē nika iskaito: “Mai anoa fasifo fanafo ififo chakana fayamakāfe. Akka nā Niospa yorafo femānāki keneafō, ato tekayamakāfe. Akka nā keneamafo mā ato tekatiro. Akka ato reteyamakāfe. Ato retetamaroko cinco oxe ato amakāfe ato omiskõimakī,” ixō ato yoya. Nāskakē kōketserefāfe ato tekafo nā chanĩmara faafoma nifo keskara paekōi meafō omiskõiafo. ⁶Nāskakē kōketserefāfe cinco oxe ato omiskõimana nā chanĩmara faafomafo napaixikani, tenetirofoma mekani. Askafikanax nakanima.

⁷Iskaratīa na kōketserefo afe keskaramākī ē mato yoinō mā tāpinō. Kamayofō itipinī faax a kamaki tsaoux katiro fetsafo reteikai. Nāskarīfai na kōketserefo nā kamayo keskarafō. Kamayo kamaki tsaoux fetsafo reteikai keskara ĩta, xanifāfe āfe oro maiti maia keskara ĩta, āto feso feronāfāke fēso keskara ĩta, ⁸āto foo kērofāfe foo keskara ĩta, āto piti poomānā piti keskara ĩta, ⁹āto xochi ano rapati kerexkōi keskara safemanano ato tsakapaiyafono a mēra ikitiroma ĩta, āto petafo pei pei ikī kamayonō karo keskara ninaiino pachakōi ĩta, fetsafo retenāifo keskara ĩta, ¹⁰keyokōi

tsitsisyafa. Āto tsitsisi yora chachitiro nifo pae keskara. Āto tsitsisi yorafo omiskōimatiro. Mā oxe cinco finōano anā ato omiskōimatirofoma. ¹¹Nā kinifā fakishifā mēra niafaka chakafo ikafo anoa āto xanifāfe ane israelifāfe mekapā Abadón famisfo. Griego mekapari Apolión famisfo. Nōko mekapari, “Yorafo Retemis,” nō famis.

¹²Akka taeyoi a omiskōiaifo mā finōfiano, akka nāno raferi a finakōia finōama.

¹³Askata Niospa ājiri fētsa āfe maneti chāi chāisafaino, Epa Nios kīfiti oro mīsa shara ano fakka māxo cuatro nia ika. Nā mīsa nakirafenoax mekaito ē nika iskafakī āfe ājirinī yoiaino āfe maneti tsofaxō nika. ¹⁴“Nā cuatro niafaka chakafo menexemexō nā faka efapa Eufrates anoxō manaifo ato mēpetāfe fotanōfo,” ixō āfe ājirinī yoia.

¹⁵Nā tsekeafō penata Niospa ato yoiaino ichapakōi ato retenōfo. Nāskakē nā niafaka chaka cuatro Niospa itipinīfani mai kaxke fetsa ano ikafo ato retexinōfo. ¹⁶Ē nika dos cientos millones sorarofō kamayo kamaki tsoafāfe fetsafo retexikakī.

¹⁷Askata Epa Niospa oa namakē ōia keskara ea ōimana nā sorarofō yafi āto kamayofō ē ōia iskara. Āto xochi ano oa chii ereai keskara kerexkōi āto xochi ano safeafō ikafo. Askatari nanakōiri ika, chaxtari ika a aō xorakomeafō. Akka a kamayofāfe āto mapo poomā mapo keskarafō. Āto āxfa mēranoax kōi fe chii ereai keskara. ¹⁸Chii fe kōi xofisakī āto āxfa mēranoax kāifaikī ato retepakeafō yorafo ichapakōi ranāri naafō. ¹⁹Āfe āxfa feta āfe tenēri yorafo retetiro. Āfe tene rono pae keskara. Āfe tene mapoya ika. Nāo yorafo omiskōimana nanōfo.

²⁰Tsoa nayamafixō āto chaka xateafoma Epa Nios Ifofaxikakīma. A

niafaka chakafo ifofamisfo xateafoma. Nāskakē oro nimofō fakāta, a kerexkōi fakkai fakkaisai nimofō fakāta, keno āfe ane bronce nimofō fakāta, ifi nimofō fakāta, tokiri nimofō fakāta; nāfo askafaxō, “Nāfo nōko nios. Nō aō noi,” ixō yoimisfo. Afāfe ōiyamafiaifono, askatari mekayamafiaifono, askatari kafāsayamafiaifono, nāskakē afo kīfimisfo. Epa Niospa nā āto kaifo yafi yora fetsafo omiskōimafiaito ōifikanax āto chaka xateafoma Epa Nios Ifofapaikanima. ²¹Ato retetakī xatemisfoma, askatari koshoiki xatemisfoma, askatari āto āfima chotamisfo, kērofāferi āto fenema chotamamisfo, yometsoriai xatemisfoma nāfo xateafoma. Tsoa āto chaka xateama. Nōko Ifo Jesús Ifofaxikakīma. Nāfo chakakōifixaxō āto chaka xateafoma nōko Ifo Jesucristo Ifofasharaxikakīma.

Epa Niospa āfe ājirinī kirika tsoa

10 ¹Askata ē ōia Niospa āfe ājiri fetsa mitsisipakōi nai mēranoax fotoaito, nai kōiya. Āfe maiti nāfa fai keskara maia. Āfe femānā xinī chaxai keskara. Āfe kishi rafe chii keskara. ²Kirika fepekemea tsofax nia ika. Āfe tae kayakai aōri fakafā femākīa paia. Akka āfe tae oshkiori mai ano paia ika. ³Askata āfe meka poomā efapato meka keskara ē nika. Askatari ē nika naitiriki fetseaito. ⁴Mē nikaxō nā yoiafo keskara ē kenekerana. Akka nai mēranoax Nios ika anoa meka fetsa ē nika ea yoiaito iskafakī: “Nā mī nika keskara āto meka keneyamafe. Mī tsoa tāpimatiroma,” ixō ea yoia.

⁵⁻⁷Askata nā Niospa āfe ājirinī takai fetsa fakafā aōri paita takai fetsari mai ano paixō anā yoia. Epa Nios nā nipanakato nai onifaa. Askatari nai mēra ikafo onifaa. Askatari mai onifaa.

Mai ano ikafori onifaa. Askatari fakafā onifaa. Fakafā mēra ikafori onifaa. Nā Nioskōichi āfe ājiri yoia iskafakī: “Epa Niospa ea ōiaino chanīmakōi ē mato yoi. Epa Niospa anā manaima. Āfe ājiri fētsa āfe maneti manekī chāi chāisafaino Epa Niospa axiai keskara āfe meka yoimifāfe yoiaifo keskara yorafāfe tāpinifoma. Iskaratīa a Nios yoimifāfe yoinifo keskara mā askakōia,” ixō Niospa ājirinī ea yoia.

⁸Askata anā nai mēranoax mekaito ē nika ea yoia iskafakī: “Oa Niospa ājiri fakafāki paita mai ano paiax nia ano katāfe. Nā kirika kataramea fēpexō tsoma fiatāfe,” ea faa.

⁹Askata ē Niospa ājiri ano kaxō ē yoia iskafakī: “Nā kirika pishta ea ināfe,” ē faito, “Nakīa, fife. Ōixō tāpikōife. Mā tāpikōixō mī tāpitiro nā meka chanīmakōi. Niospa meka shara. Askatari mī tāpitiro na meka yoiaifo keskara yorafo omiskōikani. Mīri tāpixō mī fāsi shinātiro,” ea faa.

¹⁰Nāskaxō ē kirika pishta fita ē ōia. Ea yoia keskara chanīmakōi mē tāpikōia. Nā Niospa meka sharafinakōia. Nāskakē nā inōpokoai yoia keskara yorafo omiskōixikani. Nā ōiax ē shināmītsakōia. ¹¹Ē askano, anā ea yoia: “Niospa afe yorafo yoipaiyai keskara anā ato yoife. Afarafo ixiai yorafoōnoa yoife, manifetsafoōnoari yoife, xanīfofoōnoari ato yoife,” ea faa.

Nōko Ifo Jesús yorafo yoipaiyai anori feronāfake rafeta ato yoixikani

11 ¹Askata na tanati metro keskara ea ināyanā ea yoia iskafakī: “Nāo Nios kīfīti pexefā anoā āfe chainipa yafi āfe xāki tanatāfe. Anoxō Nios kīfīti mīsari tanafe. Askatari a mēranoax fanā ikanaifo ato tanasharafe afe tiito Epa Nios fanā ixokanimākai, askatari afe tiixori kīfikanimākai ato

tanasharafe. ²Akka a ketokonō mapoāfo a israelifoma ato tanayamafe; afāfe na Jerusalén anoāfo ato chakafakani oa fākka nō afara faanano fākka peamanaino kāitiro ma keskafakani ato. Cuarenta y dos oxe amaxō ato askafaxikani. ³Nāskakē nā feronāfake rafe ē ato nīchixii. Nā rafeta nā ē ato yoipaiyai anori ato yoixikani. Un mil dos cientos sesenta pena ato yoixikani ēfe meka. A rafeta āto rapati chapokōi safexō ato ōimaxikani. A ato chakafamisfāfe, ato ōikakī a afara chakafamisfo shināxikani,” ixō ea yoia.

⁴Nāskakē Niospa afe yorafo yoipaiyai keskara nā rafeta yoimisfo. A rafe oa ifi olivo keskara. Āfe xini fospia keskariai, a feronāfake rafe Niospa Yōshi Shara ato mēra nanekōiafo. Askatari afia rafe oa rāpari ōtai keskara. Mā fakishkē rāpari otakē nō ōisharakōitiro. Nāskarīfakī nā rafeta Niospa Yōshi Sharaōxō ato tāpimaxikani Niospa meka. Mā isharakōikaxō āto Ifāfe meka ato fe yorafo yoixikani. ⁵Na Niospa meka yoimis rafe fetsafāfe ato chakafapaiyaifono, āto axfa mēranoax chii kāitiro ato koofaxii nanōfo. Nāskakē nā rafe tsōa ato chakafatiroma. ⁶Epa Niospa ato yoiaino, nā rafeta āto mekapa oi nesefatirofo anā fena oi iyamanō nā ato yoiaifotiā. Askatari faka yafi īa āto mekapa fetsafatirofo oa imi keskara inō. Askatari afara afeskarafapaikakī āto mekapas afara meseni fetseaifo fatirofo pae fetsa fetsatapafori fatirofo.

⁷A feronāfake rafeta mā ato yoikī senēfaafono, a chakakōi mai kinīfā mēranoax Satanás shināmanaino, tsekeinākafā a feronāfake rafe retexii. ⁸Mā reteafono, fāi nēxpakīa pakeax rakaxikani nā Jesús mastanifo ano, a Jerusalén ano. Nā Jerusalén anoāfāfe nōko Ifo Jesús āfe meka shināmīsfoma.

Nāskakē nō aōnoa yoitiro iskafakī: “Na Sodomā ano ikafo feta Egipto ano ikafāferi, afaa shināpaonifoma. Nāskakē chakakōi ipaonifo anoafō. Nāskarākōi Jerusalén anoafōri.” Nāskax nā feronāfake rafe Jerusalén anoax nakanax āto yora fai nēxpakīa rakaxii. ⁹Nāskakē yora fetsafo a mai fetsa ari ikafāfe, xoko fetsafāferi, meka fetsayafāferi, a feronāfake rafe rakafāfe ato ōixikani. Nāskafono āto xanifofofāfe, “Ato fena maifayamakāfe,” ixō ato yoixikani ato noikaspakōikakī. Nāskakē tres nia ato ōixikani. ¹⁰Askaito ōikani a mai ano ikafo atoki inimaxikani. Askakanax atoki inimakakī fista axikani. Aa ranā kaxpa afarafo inānōnāxikani. Yoikani iskaxikani: “Anā na rafeta noko fekaxtefakanima kiki,” ikanax inimasharakōikani. “Anā nōko chaka noko yoikanima,” ikanax yoināxikani.

¹¹Askafiaifono mā tres nia oxata nayoafono anā chipo Niospa ato otofaxii a feronāfake rafe. Askaito ōikani a ato mānāo nikaxō ato ōiaifo, afo mesexikani, ratekōixikani, askaifāfe ato ōikani. ¹²Askata nā feronāfake rafe otokāta nai mēranoax mekaito nikakani ato iskafaito: “Niri ekeki māpeferakāfe,” ato faito nikakani a rafe āto ferotaifi ronoinifōfākani nai kōi mēra māpefainifokani. Askaifāfe a ato noikaspaiifāfe ato ōikani. ¹³Askata samama atoya mai naya naya iki finakōia. Pexefā rasi fisti rasi potaito ē ōia. Askaino siete mil yorafo naafo. A naamafāferi ratekakī Nios yoiafo, “Nios mīfi afama mīшти fatirokī,” faafo.

¹⁴Mā afo askayoa anā chipo finakōixii.

**Niospa ājiri fētsa āfe
maneti chāi chāisa faa**

¹⁵Akka Niospa ājirinī chipokōitakī nā sietepa āfe maneti chāi chāisafaino, nai

mēra Epa Nios ika ariax fāsikōi mekaifāfe ē nika iskaik mekaifāfe:

Iskaratīa na nōko Ifo Cristo xanifokōi iki nāmānoax nai mēra ika keskarari ixii nāatixō xanifo īpanaka, ixō yoiafo. ¹⁶⁻¹⁷Akka nā Jesús chanīmara faafo ato kexemisfo nā veinticuatro feronāfakefo tsaokanax a Nios nāmā feopakefofā nafo Nioski inimayanā iskafafō:

Iaicho, mī fāsi sharakōiki! Mī afama mīшти famiski. Mī Yōshi Sharapa ato īkinā. Afama mīшти onifaaxma mī iyopaonixakī. Iskaratīari mī nia. ¹⁸A mai fetsa anoafāfe mia noikaspamisfo mikiki ōitifishkikōikakī mefe ikaspakakī. Afama mīшти chakafamisfo. Askaifāfe ōikī, mīri ato kopikī ato omiskōimaxii atoki ōitifishkikōixō. Akka a mia Ifofamisfo mī ato ināsharakōixii afara sharakōifo. Akka a mia yonoxoyanā mī meka mēxotaima yoimisfo afo mī ato ināsharakōiketsaxii, a mia chanīmara famisfo tii; keyokōi afaamaisfo ita, a xanifori a afama mīшти ichapayafōri mī ato ināsharakōixii a mia Ifofamisfo tii. Akka nā yorafo chakafamisfo, mī ato omiskōimaxii, a amēranoax, omiskōimisfo mēra mī ato potaxii, ixō yoiafo.

¹⁹Askata a Nios kīfiti pexefā nai mēranoax fepekemeaito ē ōia. Nānoa Niospa kafo ē ōia, nā kafo mēra a Niospa israelifo yoini kirika kenea nanea ika. Askatari ē ōia kana pee ikaito nairi tiri ikaito ē nika, mīamāfanēri mai naya naya akaito ē ōia, nai mēranoaxri oi kaya ikaino, oi nami keyopakeaito ē ōia.

**Kēro yafi kapetafā keskara
nai mēranoa Juan ōini**

12 ¹Askata ē afianā ēfe namapa ōia keskara ē mato yoinō a ea Niospa ispaito ē ōiafo nā inōpokoaiho ōikī ē tāpinō a tsōa ōimismafo. Ē kēro

ōia āfe rapati oa xini pee ikai keskara safea ika nai mēranoax. Oxe kamaki paiya keskara. Askatari āfe maiti ano fishi doce aō neafo. ²Askata nā kēro mā chaima fake kāikī, fāke pāefai. ³Askainori fetsari ē ōia a tsōa ōiyomisma keskara nai mēranoax. Nā Satanás oa ronofā keskara efapanāfakōi ōshimāfa, askai mapo ichapayakōi siete mapoya, askai a āto xanīfokōichi maiti sharakōi keskara maiya siete faxō, askatari āfe māxofori diez ika. ⁴Askata āfe tene fininīfōfā nai mēshanānaino nai mēranoax fishi rasi pakea. (Naskarifakī Epa Niospa ājirifo Satanás atiri ato chakana fama ato īkipaikī, “Ea ifofakāfe,” ixō ato feparapaikī. Nāskakē a keskara niafaka chakafo ato īkinō Niospa nāmā potani nāmāxō ato īkinō.) Nāskakē mā kēro chaima fake kāiyaino, a ronofānē kexei āfe fake pīpaikī kāiyaito. ⁵Askata a kēro fake kāi feronāfake mitsisipakōi. Nāskakē yorafo manifo tii, ato kexesharakōixii āto xanīfo finakōia ixii. Mēstekōi ato yoisharakōixii nikasharakōinōfo. Askafiaito a fake yome rama afa kāiyaito ronōfānē pipaiyaino Niospa ifirisafaa nai mēranoax afe xanīfokōi inō. ⁶Askaito ōifaini afa ichoachāi tsōa istoma ano a Niospa afetiāma itipinī faxoni ano Satanás afeskafanōma arixō Niospa kexenō cuarenta y dos oxe akaino Niospa kexesharanō. ⁷Askatari ē anā ōia Satanás āfe inafo fe nā ājiri Miguel āfe inafo nai mēranoax retenāpaiyaifono Satanás ato finōpaiyaino. Nāskaxō Satanás Niosri finōpaini. ⁸⁻⁹Akka Satanás ato finōpaifikī ato finōnima. Nāskakē fanī itirokēma Niospa nāmā potani āfe inafoya. Taeyoi ājiri iyopaoni. Nāskaxō nāato keyokōi yorafo maifo tii anoafo ato pāramis anorima ato yoikī chaka shinānōfo, chaka nīpaxakakī.

¹⁰Askaito ē anā nika meka efapato mekai iskaito: “iAicho! Epa Niospa mā Satanás nirixō nāmā potakī, mēxotaima āakōi noko fanīrira pārarifaifo. Nāskakē Epa Niospa Satanás finōinīfōfana. Nāskakē Satanás anā nōko ifo ikima, anā fanīrira noko shināmanima, Epa Nios fisti nōko Ifokōi iki. Askatari āfe Fake Jesucristori nōko Ifokōiri iki. Nā rafe nōko Ifokōi. ¹¹Nāskakē Jesús Ifofaxō mēxotaima nō yoimis niri nai mēra oyoxoma nō yoiyopaoni nāmāxō iskafakī: ‘Nōko Ifo Jesús, Niospa Fakekōi, oa oveja fake keskaraxō noko nāxoni nōko chaka noko soaxoxiki,’ ixō nō yoimis mēxotaima. Askatari nō Niospa meka ato yoimis. Nāskai nō meseima, ‘Noko retēfiaifono, nō inimasharai,’ ixō anori mēxotaima nō yoimis. Askaxō nō Satanás finōinīfōfana. ¹²Nāskakē māri nono nai mēranoax inimakāfe Niosnoax. Nā chanīmara faafāfe Jesúsxō mā Satanás finōkōiafo. Akka Satanás Niospa nāmā potani nai mēraxō. Askafaino ōitifishkiki nāmā fotoxō yorafo chakafapaikōi. iOoa! Yorafo ono mai anoax fe fakafā mēranoaxri omiskōikani. Satanás mā tāpia afetiāra Jesús mai ano fotoai tsōa anā afaa chakafanōma. Nāskara mā tāpiax Satanás ōitifishkikōikī keyokōi maifo anoafo ato chakafamapai omiskōinōfo Jesús fe īpaxanōfoma,” ixō nai mēranoax mekaito ē nika. ¹³Mā afo nikakī ē anā ōia afia ē ōiyoa keskara. Mā Niospa Satanás nāmā potano, Satanás shinākī iskafai: “Na kēro ē akiki nokoxō omiskōimanikai,” ixō shinākī Satanás chīfafaina. ¹⁴Nāskakē Niospa nā kēro tetepafā pei keskara inā aō katanō tsōa istoma ano. Nā afetiāma Epa Niospa itipinī faxoni ano mā kaxō anoxō piinō cuarenta y dos oxe akī, nā niafaka chakata ronofā keskarato afeskafanōma. ¹⁵A kēro ari

ikano chakafapaikai Satanás ari kai. Mā kaxō chaima nikaxō āfe axfapa faka siiakī faka faipafānē iyotanō āsapaikī.

¹⁶Askafaito ōikī Niospa mai kaxkexoni a mēra faka faipafā ikikaitanō a kēro afeskafanōma. ¹⁷Nāskaito ōi Satanás a kēroki ōitifishkikōina. Nāskax nā kēromā āfe fakefoki kaa ato retepai, nāfāfemāi Niospa meka nikakōisharaifono isharakōiyanā Jesús Ifofasharakōiyanā. ¹⁸Askata ē anā ōia Satanás fakafā kesemē nia.

**Fakafā mēranoax yoinā keskara
mesekōi kāinākafana**

13 ¹Askata ēfe namapa ē ōia keskara afianā ē mato yoi. Ē ōiaino fakafā mēranoax yoinā keskara mesekōi kāinākafanaito ē ōia. Nā yoinā pōfe keskaraōnoa ē mato yoinō. Ea nikasharakāfe. Nā fistifiax mapo ichapaya, siete mapoya. Askatari āfe māxo rasi diezya. A āfe māxo rasi xanīfāfe maiti maimakī fetsa. Nāskaxō Epa Nios mekafakī chakakōi faa. Āfe femānāfoki ane fetsafo chakakōifo nēta.

²Askai oa poomā keskara āfe yora. Askatari āfe tae oa osopa tae keskara. Askatari oa poomā axfa keskara. Nāskara Niospa ea ōimana ē tāpinō a feronāfāke Satanáoxō tāpikifinakōia, oa xanīfo finakōia keskara ixii nāmānoax. Satanás āfe yōshi ināno ato yoisim ixii, afama mīshti fakī fetsaki ato ōimaxii.

³Āfe mapo fetsa ano mā māpeafiafono anā otoax afianā nia. Nā mai tio anoxō yora rasichi ōikani askaito: “Kee, ¿afeskax otoamē mā nākōina nō ōia?” ixō yoikani. Nāskaito ōikī ifofaxikani.

⁴Nāskakē ifofakaxō yoikani Satanás iskafakī: “Mī fāsi sharakōi. Mī afama mīshti famis,” fakaxō ifofakani.

“Nāskaxō nā yora pōfekōi inō mī yōshi mī inā nōko xanīfokōi inō. Nāskaxō nō mia chai faima,” fakaxō yoikani.

Askatari oa yoinā keskara akiki inimakakī fanāixokani iskafakakī: “Mia keskarakai tsoama. Mī fāsi sharakōi. Miakai tsōa chakafatiroma. Mī fistichi ato finōkōia,” fakaxō yoikani fanāikakī.

⁵Askatari anā Nios chakakōifakī yoia iskafakī: “Fato fetsakai ea keskarama. Ē Nios finōkōia,” ikax, āa chanī Nios chakafakī finakōimis. Nāskafekē Niospa yoixii: “Cuarenta y dos oxe finōta mī anā afaa fatiroma xanīfokōixō afara fetsafo sharafakī.” ⁶Nios noikaspakī mekafakī fetsaito ē nika iskafaito: “Fato Nioskai nai mēra ikama. Anā ano Niosma. Mā kaxpakōi mā Nios Ifofai,” ixō yoia. “A yora namisfāfekai fato Nios Ifofamisma,” ato fakī fetsai. ⁷Askatari Satanás ifofakaxō ato afara shināmānaino yorafāfe a Jesús Ifofamisfo ato finōpaikī ato retepaikani āto xanīfo ipaikakī. Askatari maitio anoafō, xoko fetsafo, meka fetsafoya keyokōi āto xanīfo ikani a feronāfake xanīfo chakakōi a Satanás yōshi a mēra nanea. ⁸Askafaxō yoisharaxikani akiki inimakakī: “Mī fāsi finakōia, mī nōko nioskōi,” ixō yoixikani akiki inimakakī. Askafāfe tāpixō nōko Ifo Niospa atoki kirika keneama a Ifofaafāfema ōikī. Mai onifataima mā tāpixō Niospa āto anefo āfe kirikaki keneni fatofāfe Jesús Ifofaimākai. Akka nā Jesús ovejanā fake keskara noko nāxoni noko ikipakexakī.

⁹Mā pachoyakī ea nikasharakāfe. ¹⁰“Nā Satanás ifofaafāfe mato karaxa mēra ikimakakī mato ikimaxikani. Askatari mato kenopa retekakī mato retexikani.” Nāskakē efe yora mīshtichi, shināchakayamakāfe. Nā nō Jesús chanīmara faafo tii nō omiskōifikī, nō tenekōixii nōko Ifo Jesús shināmakitama.

¹¹Askatari ē anā ōia oa namakē ōia keskara. Mai mēranoax kāinākafanaito ē ōia yoinā pōfe fetsa keskara. Āfe māxo

tiixo pishta rafe oveja fakenā keskara. Askai fāsikōi mekai oa poomā keskara āfe meka mēxakōi chai potai. Askaito ē ōia. ¹²Akka nā yoinā pōfe taeyoi fakafā mēranoax kāiyaito afama mīshiti atiroxakī nāato yoiaino nā rama oatori afama mīshiti atiro nā fētsa aka keskafakīri nāskaxō yorafo tii īkitiro. Keyokōi maifo tii anoafo ato yoiā iskafakī: “A yoinā keskara mā mapoki rerafo mā nayofiax afianā mā otoa nā fisti ifofakāfe. ‘Na nōko ifora,’ fakāfe,” ixō ato yoiā. ¹³Afama mīshiti tsōa atiroma keskara ato ispa yorafāfe chanīmara fanōfo. Nāskata yorafāfe āto ferotaifi nai mēranoa chii fotomana. ¹⁴Satanāōxō nāskarifikī yorafo pāra niosra fanōfo. Askafata ato yoiā: “Nā yoinā pōfe keskara retēfiafono mā otoa nā nimofonōfā faxō inākāfe a keskara faxō,” ixō ato yoiā. ¹⁵Nānori ato yoiaino mā nimofonōfā māpeakano xākaitiroma. Askafiano Satanāōxō xākaima mekanō, askatari a siete mapoya mekayamaifo ato retenō. ¹⁶Askata anā ato yoiā iskafakī: “Maitio ikafāfe āto mēke kayakai aōri kenenōfo askayamakī āto femānāki kenenōfo.” Nā yoinā pōfe keskara fakafā mēranoax kāiato āfe ane keneyamakī āfe número ato kenemana. Keyokōi ato kenemana. Fakefo kenemata, xinifori kenemata, afama mīshitifoyari kenemata, afaamaisfori kenemata, inafomari kenemata, inafori kenemana. Tsoa pishta finōmanama. Keyokōi nā yoinā pōfe keskarato āfe ane atoki kenemana. ¹⁷Tsōa nā ane keneyamaxō afaa fitiroma. Askatari afaa ināmītsatiroma a piaifori tsōa fitiroma, a rapati yopaifori tsōa fitirofoma. ¹⁸Nāskakē Niosxō shināsharatirofo nā yoinā pōfe keskara āfe número tāpitirofo. Āfe número tāpixō āfe aneri tāpitirofo. Nā yoinā pōfe keskarafīax feronāfakēkōi, āfe número seiscientos sesenta y seis.

Jesús chanīmara faafo ciento cuarenta y cuatro mil akiki fanāikani

14 ¹Askata ēfe namapa ē ōia keskara afianā ē mato yoinō. Nā Jesús ovejanā fake keskara māchifā āfe ane Sión ano nia ē ōia. Askatari ciento cuarenta y cuatro mil afe yorafo afe niafo ika. Āfe ane Jesús yafi Epa Nios āto ane femānāki kenea ē ōia. ²Nāskatari nai mēranoa meka efapakōi ē nika. Faka pōoitifā keskara ē nika, nai tiri ikai keskarari pachakōi ē nika. Meka efapari ē nika yora ichapa fanāikanaifono āto manetiya ichapa rasi fanāikanaifāfe ē nika. Nā manetinī āfe ane arpa. ³Fana fena tsōa nikayomisma Epa Nios ferotaifi fanāixōafo. Nānoxori nā cuatro Niospa onifanifāfe nikakani. Askatari nā veinticuatrofāfe nikakani. Nā ciento cuarenta y cuatro mil nono mai anoa Jesús ato ifini, nāfāfe na fana fena tāpitirofo. Tsoa fētsakai tāpitirofoma. ⁴Nā ciento cuarenta y cuatro mil yorafāfe nōko Ifo Jesús Ifokōi famisfo. Afara chaka shinātamaroko Jesúsnoa shināfafāikani. Aato ato ifimisi ato nāxonixakī Epa Nios yafi āfe Fake Jesús Ifokōi fakanax āfe yora inōfo. Ato iyopaiyai ari afe fomisfo. Ato katoa afe yorakaxō ato yoiāi keskara anōfo. ⁵“Nāfāfe chanīki yoimisra,” ixōkai tsōa atoōnoa yoitiroma. Jesúsnoax isharamisfo. Aōxō afaa chakafamisfoma.

Niospa āfe ājiri trespa yoiāfo

⁶Askata ē ōia Niospa ājiri fētsa nai mēra ika fāsi keyakōi yoyakī keyokōi yorafo maifo tii anoafo ato meka shara yoiā. Yorafo keyokōi yoita, xoko fetsafo tii yoita, nā meka fetsa fetsatapāfāfe meka yoimisfori yoita, nā mani fetsafo tiiri ato meka shara yoiā. Epa Nios nipanakaōnoa ato yoiā. ⁷Mekakī fāsikōi ato yoiā iskafakī: “Nios shinākāfe.

Nikakōikāfe. A noikōikāfe. ‘Mī sharakōi, mī afama mīshti mī atirora,’ fakāfe. Iskaratīa Niospa nā keyokōi chakafamisfo ato omiskōimani. Nāato nai onifani, mairi onifani, fakafāri onifani, faka sharari onifani. Nāskakē a noikāfe: ‘Mī nōko Ifo Nios sharakōi,’ fakāfe,” ato faa.

⁸Askata Niospa ājiri fētsa mā mekai keyoano fetsari nokotoshixō iskafakī yoia: “Babilonia ano pexe rasi iyopaoni. Iskaratīa anā ano tsoa ikama. Nānoxō yorafāfe afara chaka shināpaonifo. Fetsafori afara chaka ato famapaonifo ato keskara inōfo. Askaifāfe Epa Niospa ato omiskōimani anā ano inōfoma. Nāskakē Babilonia anā anoma,” ixō Niospa ājirinī nai mēra ikato yoia.

⁹⁻¹¹Askata afianā Niospa ājiri fetsari nai mēranoax nokotoshixō meka fāsikōi yoia iskafakī: “Fētsa nā yoinā pōfe keskara yafi āfe nimofa keskara nikakōikī yoimis iskafakī: ‘Nā ēfe nioskōi,’ ixō anori yoikī āto mēkeki kenenifo, askayamakī āto femānāki na yoinā pōfe keskarato āfe ane keneafāfe Epa Nios atoki ōitifishkikōixii. Nāfo Niospa ato fāsi kerexkai omiskōimaxii. Chii mēra ato potafianokai keyonakafoma. Jesús āfe ājirifo sharakōifo feta ōiaino a omiskōipakenakafo mēra Niospa ato potaxii chakamāi famisfono, Nios nikakaspakakī. Pae meekakī xatenakafoma. Tsōa ato ifitiroma, nā yoinā pōfe keskarato āfe ane āto mēkeki keneafono, askayamakī āto femānāki keneafono. Nāskakē pena tii ita, fakishchāi ita, omiskōixikani tenepakenakafoma,” ixō Epa Niospa āfe ājirinī yoia.

¹²Nāskakē efe yora mīshtichi, māto ōiti inimamasharakāfe. Omiskōifikī tenekāfe. Niospa noko yoini keskara akāfe. Nōko Ifo Jesús kachikiri fayamakāfe.

¹³Askata ē meka nika nai mēraxō ea yoiaito: “Ē mia yoiai keskara kenefe. Fatorafo nōko Ifo Jesúsnoax nai, inimakōixikani,” ixō ea yoia. “Chanīmakōi. Mā nakanax anā omiskōitirofoma. Epa Niospa ato ama keskara akōikanax, nāskakē inimakōixikani. Nāfāfe fetsafo shara faxomisfono Nios atoki inimasharaxii. Akka Epaki nokoafono ato ināsharaxii,” ixō Niospa Yōshi Sharapa yoia.

Nā chakafamisfoki Nios ōitifishkikōikī maifo tii anoafō ato ichanāfai ato omiskōimaxii

¹⁴Akka ēfe namapa ōia keskara afianā ē mato yoinō. Ē afara fetsa ōia nai kōi oxokōi kamaki feronāfake tsaokē ē ōia. Ē ōikī iskafaa: Xanīfāfe maiti orokōi maiya, askatari keno extea ikikōi tsoma ika. ¹⁵Akka āfe ājiri fetsa Nios kīfiti pexefā anoax kaxō fāsikōi yoia iskafakī: “Nā maifo tii ano mā fanafo ōshia. Nāskakē iskaratīa mā fanafo chetekani. Akka mī keno exteato taxtexō ichafafe,” faa. Nānori yoifikī fanakōifoōnoa yoiama. Niospa yorafoōnoa yoia iskafakī: “Iskaratīa keyokōi Jesús chanīmara faafo tii ifife Epa Nios fe ika anoax ichanākanax afe ipaxanōfo,” ixō yoia.

¹⁶Askata nā nai kōi kamaki tsaooto āfe kenopa fanafo taxtea keskafakī āfe sharaōxō a chanīmara faafo tii ifia afe ipaxanōfo.

¹⁷Askata ē ōia nai mēranoa ājiri fetsari Nios kīfiti pexefā anoax kaito, aatori keno extea ikiai tsoamax. ¹⁸Afianā ājiri fetsari Nios kīfiti mīsa anoax kaa. Nāato Niospa maifo tii ano koatiro. Nāatori keno extea ikiai tsoamax fāsikōi mekayanā yoia: “Nā uva fimi mā pachiki. Mextexō ichafafe,” ixō yoia. Nāskarīfakī Epa Niospa āfe ājiriōxō a nikakaspamisfo ichanāfaxii. ¹⁹Nāskata

nā Niospa ājirinī āfe keno extea ikiai tsoanaxō uva xatexō āfe tsinīti mēra nanea āfe ene fonō. Nāskarifikā Niospa ājirifāfe nā Niospa meka nikakaspamisfo ato ichanāfai. Akka Nios atoki ōitifishkikōixō ato omiskōimani. ²⁰Nios ika anoxō ato omiskōimanama. Iskafakī ēfe namapa ē ōiai keskara ea ōimana. Fetsafāfe ato retexikani āto imi ichapa foxii. Askara tsōa ōiyomisma. Āto imifo kamayoto tesanākōixii. Āto imi chaikōi trescientos kilometros foxii. Ato imi noakōi un metro ixii, nakirafekōi. Nāskarifikā nā Epa Nios nikakaspamisfo omiskōixikani ato omiskōimanaitia.

Epa Nios āfe ājiri siete afianā ato yoia mai anofo ato omiskōimanō

15 ¹Askata anā ēfe namapa ē ōia keskara ē mato yoinō. Afara fetsa tsōa ōiyomisma nai mēranoa ē ōia. Ē ratekōia. Akka Nios nā yora nikayospafoki ōitifishkiki. Nāskakē āfe ājiri siete ato yoia keyokōi mai anofo ato omiskōimanōfo. Mā askafafono Epa Niospari ato omiskōimani. Akka anā tsoaki ōitifishkixō, Niospa ato omiskōimatiroma.

²Askata ē ōia fakafā feroikima raka chiiya osia keskara. Nāno yorafā rasi niafo ika. Nā yorafāfekai yoinā pōfe keskara ifofaafoma; āfe nimofori ifofaafoma; āfe numerori āto yoraki keneafoma. Nāfāfe ato finōkōiafo. Nā fakafā feroikima raka chiiya osia keskara a kesemē maniafo. Epa Nios ato tii maneti ināpakea. Nā maneti āfe ane arpa. ³Taeyoi Nios yonoxomiskōi Moisés ipaoni. Nā Moisés āfe rāfiffo finōkōiax fanāini keskara nāskarifikai āto arpa tsoamakaxō Jesús shinākakī fanāikani a Moisés fanāini keskara iskafakakī:

Ifo, mīfi Nioskī. Mī afama mīshti atiro. Mī amis keskara sharakōi. Tsoa fētsakai atiro. Mī mai fetsa

anoafori keyokōiōnoax mī āto xanifokōi ipanaka. Mī shināmisi keskara mēstekōi ikōina. ⁴Ifo, keyokōi mikiki mesekakī mia nikasharapainōfo. Mī afama mīshti tsōa ōiyomisma mī atiro. Keyokōi maitio anoafāfe anori yoipakexanōfo. Mī fistichikai afaa chakafamisma. Mī shara fisti famis. Afetiara mī ato apaiyaitia mī ato omiskōimaxii a chakafamisfo. Chanīmākōi mī ato askafaxii. Keyokōichi mā fēkaxō mia shinākani inimayanā fanāikani, ixō yoiaifāfe ē nika.

⁵Askata afianā ē ōia nai mēranoa Nios ika ano. Ea fēpexona Nios ika ano ē ōinō. ⁶Nios ika mēranoax āfe ājiri siete ichanāfo. Rapati oxokōi chainipa choshtama fafeai safeafo, oro ōshi keskarato xonexemeafo. Nāfāfe mai anofo ato omiskōimakani omiskōinōfo. ⁷Nāskakē nā cuatro Niospa onifaa fētsa Niospa āfe ājiri sietefo ato oro kecho ināakea. Nios nā nipanakato nā Ifofaafoma mai anoafoki ōitifishkikōiki nā kechofo mēra afara chakafo fospi faa nāskaxō chipo atoki ājirifāfe nachiakeafono omiskōinofo. ⁸Nios ika mēra kōinifā nashfiai keskara. Niospa āfe kerex shara a mēra fospia. Nāskatari a mēraxō chaxasharai. Akka mai anoxō nā Nios nikakaspamisfo Niospa ājirifāfe ato omiskōimakani omiskōinōfo. Nāskakē a ato omiskōimanai xateamano tsoa Nios ika ano ikitirofoma.

Nikayospafo Niospa ato omiskōimani omiskōinōfo

16 ¹Askata Nios ika ariax fāsi mekaito ē nika. Niospa ājirifo siete ato yoia iskafakī: “Niospa a nikakaspamisfo mai ano ikafo atoki ōitifishkiki nā kechofo mēra afara chakafo fospi faa atoki nachitakāfe,” ixō ato yoia.

²Nikakaxō Niospa ājiri fētsa taefakī āfe kecho mēranoa nai mēraxō mai ano nachia. Nāskatari nā yoinā pōfe keskarato āfe ane āto mēkeki keneyamākī āto femānāki keneafō, āfe nimofō keskarari ifofaafō nāfo kooyoi fetsekaxō paekōi meexikani.

³Askata afianā Niospa ājiri fētsa āfe kecho mēranoa nai mēraxō fakafānaki nachia. Mā nachiano fakafā ōsinātana nā yora reteafono āfe imi foa keskara. Nāskakē keyokōi nā fakafā mēranoax nai fetseafō.

⁴Askata afianā Niospa ājiri fētsa āfe kecho mēranoa nai mēraxō fakafōki nachia, askatari mai mēranoax faka tsekeafokiri nachia. Nachiaino fakafo fe mai mēranoax faka tsekeafō fe imi keskara osiafo. ⁵⁻⁶Askatari Niospa āfe ājiri fetsa mekaito ē nika. Nā faka kexemisto iskafakī yoia: “Epa Niosi, mī tsoa onifataima mī iyopaoni. Nāskakē nā mī iyopaoni keskarari iskaratīari mī nīpanaka. Mī shara fisti amis. Aicho, iskaratīa nā mia nikakaspamisfo mī ato omiskōimani chanīmakōi. Āto chaka xatekaxō mī Fake Jesús Ifokōi fanōfo, mī meka ato yoimisfori nā Jesús Ifofaafāfema ato reteafō. Nāskakē nā mia Ifofaafoma mī kopikiri ato namai chanīma. Mefe yorafo omiskōimamisfo. Nāskakē ato kopikiri nā mia Ifofaafoma mī ato omiskōimani omiskōinōfo. Chanīmakōi ato omiskōimani,” ixō Niospa ājirinī yoia.

⁷Askatari Nios nai mēra ika anoa nā kifiti ano fistixō Epa Nios kifimisfo anoa ē fetsa nika yoikī iskafaito: “Nōko Ifo Nios, mī ājirinī yoia keskara chanīmakōi. A mia nikakaspamisfo mī ato omiskōimatiro. Chanīma, mī mēstekōi ixō mī ato omiskōimani,” ixō yoia.

⁸Askata Niospa ājiri fētsa Nios ika arixō āfe kecho mēranoa afara chaka

xiniki nachia. Akiki nachiano xini chii keskara ikano yorafo koofafo. ⁹Xini xanakōiaino yorafo koofafo. Kookani omiskōiafo. Mā tāpiyomisfo Niospa ato omiskōimafaiaino āto chaka xateafoma. Nios Ifofatamaroko. Iskafakī yoimisfo: “Niospa noko chakafai. Nios chakakōi,” ixō yoiafo. “Nios shara. Afama mīshti fatiro,” ixōkai tsōa anori yoipaikanima.

¹⁰Askatari Niospa āfe ājiri fētsa Nios ika arixō āfe kecho mēranoa nā yoinā pōfe keskara chakakōikī afe ikafokiri atoki nachia. Nachiano nā yoinā pōfe keskara ifofaafō ika ano fakishkōi ika. Nāskakē keyokōichi paekōi meafō, aripe iyanā. ¹¹Nāskai omiskōifikakī āto chaka xateafoma. “Niospa noko iskafai. Nios chakakōi,” ikaxō āto chaka xateafoma.

¹²Askatari anā Niospa ājiri fētsari nai mēraxō āfe kecho mēranoa faka efapa āfe ane Eufrates kamaki nachia. Mā nachiano nā Eufrates netsorisatana. Nāskakē xanīfofo xini oaikirinoax fekani, mā Eufrates netsokōiano, āto sorarofō feta pokeferakani.

¹³Askatari ē niafaka chakakōifo tres fexko keskara ē ōia. Fetsa ronōfā keskara nā Satanás āfe āxfā mēranoax kāikaina, fetsari nā yoinā pōfe keskarato āfe āxfā mēranoax kāikaina, fetsari: “Ē Niospa meka ē mato yoimisra,” iki, a chanīmisto āfe āxfā mēranoax kāikaina. ¹⁴Nā tres niafaka chakafāfe tsōa afaa ōiyomisma keskara afama mīshti yorafo ispafo. Keyokōi xanīfofo a ano fokani ato ichanāfanō nōko Ifo Jesús afe yorafo retenōfo. Nāskatari nōko Niospa afama mīshti famisto afe yorafo ispaxii.

¹⁵Askatari nōko Ifo Jesús ato yoiaito ē nika iskafakī ato yoia: “Ea nikakāfe. Yometso tsōa yoiyamano koshikōi pexe mēra ikirisatiro afara onexikī. Nāskarifikakī ē tsoa tāpimanima nā ē matoki nokoaitia. Ē matoki samamashta nokorisai. Mā itipinīsharakaxō ea

manasharakanax inimasharaxikani. Akka tsoa itipinisharayamano ē matoki nokoaitia keyokōi yorafāfe ea ōikani afāfekai ea Ifofasharama. Nāskakē rāfikōitirofo,” ixō yoia.

¹⁶Nānori nōko Ifo Jesús yoifiano nā tres niafaka chakafāfe keyokōi xanīfofo maifo tii anoafō ichanāfaa Niospa yorafō retepaikī. Ato ichanāfai nā mai āfe ane israelifāfe mekapa Armagedón famisfo anoxō.

¹⁷Askata Niospa ājiri fētsa anā nai mēraxō āfe kecho mēranoa nachia. Mā nachiano Epa Nios meka fāsikōi iskai: “Mē keyokōi aka,” ixō yoiaito ē nika.

¹⁸Askatari fāsikōi kana piishikai ita, afarafō pachakōifo ita, nai tiri iki ikai ita, mai naya naya ita, askarafokai tsōa ōiyomisma. Nā feronāfake onifakī taefanitia tsōa mai naya naya iki finakōiaito askara tsōa ōiyomisma.

¹⁹Akka nā Babilonia anoax mai naya naya ikaino mai tres kaxketani. Maifo tii anoari āto pexe rasi nā mai naya naya ikaino maokomea. Nā Babilonia anoafō anā Niospa shināni afara chakafamisfono. Nāskakē atoki ōitifishkikōikī ato omiskōimani omiskōinōfo. ²⁰Nāskatari nā mai toomāfā anoafō yamarisatana. Keyokōi māchifāfori yamarisatana. ²¹Nāskatari oi nami matsi tokorofo efapakōi āfe efe cincuenta kilo nai mēranoax yorafoki pakea. Askafiaito ōikakī āto chaka xateafoma. “Nios chakakōi. Na oi nami efapakōi nokoki potai,” ixō yoiaifāfe ē nika.

Mai fetsa anoafō kēro feroma keskarafō

17 ¹Askata anā ēfe namapa ē ōia. Afara afeskara ixiai keskara anā ea ōimana. Nā Niospa ājiri sietepa kecho tsomafo ikafo akka fistichi ea yoia: “Niri ofe. Na pexe ichapa rasi fakafāfo chainashta anoafō chakakōifo.

Kēro feromakōi keskarafō Nios nikakaspakani. ²Akka keyokōi xanīfofo maifo tii anoafō ato fe chaka imisfo. Nāskakē atoōnoax afori chakakōifo ikafo. Nā kēro feromakōi keskara ikafo chakafakani. Akka nā Niospa ato omiskōimaxiai keskara ē mia ōimanō,” ixō ea yoia.

³Ea askafaino ē anā namakē ōia keskara ē ōia. Epa Niospa Yōshi Sharaōxō ājirinī ea iyoa tsōa istoma no ea iyoa. Nānoa kēro ē ōia yoinā pōfe ōshikōi kamaki tsaokē. Nā yoinā pōfekōi āfe yora tiixō ane ichapato kenea ika. Keyokōi nā anefo kenekī Nios mekafakī chakafaa. Nā yoinā pōfe āfe mapo sieteya. Āfe māxo diezya. ⁴Nā kēromā sama chainipa yafi nana ōshi safea ika. Oro fakka fakka ikai keskara safea.

Askatari makex keskara fakka fakka ikai sharashta yafi fetsa āfe ane perla oxoshara, nāri safea ika. Nā kēromā kecho oro tsoma a mēra afara chakakōi naneato, a mēra nanea keskara yorafō afara chakakōi fetsa fetsatapafo chakafama. Āto mēra nanexō ato afara chaka shināmana. Ato pāemata, chanīmis ato imata, āto āfima chotamisfo ato imata, āto fenema chotamamisfo ato imata, nāskara chakakōifos ato imamis. ⁵Āfe femānāki kenea keskara tsōa tāpimisma. Iskara kenea: “Babilonia anoafō tsoa keskarafoma. Nā kēro feromakōichi Nios nikakaspai keskarafō. Nāskakē fetsa fetsatapafo chakafakī finakōimisfo,” ixō kenea. ⁶Nā kēro feroma keskarato Jesús chanīmara faifo ichapakōi ato retea inimayanā. Nāskaito ōikī tāpia. “Choo, na kēromātsi ato retemiski,” ixō ē shinā. ⁷Ē askaito Niospa ājirinī ea iskafaa: “¿Afeskai mī ratemetsamaimē? Ē mia yoinō, ea nikapo. Na kēro yafi nā yoinā keskaraōnoa ē mia yoinō. Na yoinā pōfe

keskara siete mapoya askatari diez mǎxoya tsōakai askara tāpiyomisima. Akka iskaratīa ē mia tāpimani. ⁸Nā yoinā pōfe mī ōiai yoinākōima. Nāfi xanīfo efa pa chakakōi. Nāato Nios nikakaspamis. Taeyoi niyopaoni. Anā iskaratīa niama. Askafīax chipo nā niafaka chakafo kinīfā mēra ika anoax kaixii. Nānoax kāifekē Epa Niospa a omiskōipakenakafo mēra potaxii anā anoax faki kanakama. Akka nā taefakī mai onifakī taefanitiā yorafāfe āto anefo Niospa āfe kirika keneni, nāfo afe ipanakafo. Akka a āfe kirikaki āto anefo keneama, afo Nios fe ipanakafo. Nāfāfe yoixikani iskafakakī: ‘iKee, ōikapo! Mā nafianixakī afianā mā otoa,’ ixō yoixikani.

⁹“Akka fētsa Niosxō mēstekōi shinākī nāato nā ē rama kenea keskara tāpitiro. Nā yoinā pōfeōnoa ē mato yoinō, ea nikasharakāfe. Āfe mapo siete mapokōima. Nā siete mapoxō xanīfoōnoa noko tāpimai. Nā ikafo siete māchifā. Nānori nā kēro feroma ika.

¹⁰Cinco xanīfofo anā anoma. Mā nanifo. Fisti iskaratīa nia. Fetsari chipo ixii xanīfoi. A chipokōi xanīfoixiai xanīfoi chaima. ¹¹Nā yoinā pōfe keskara ōshi ē mia yoia, ari yoinākōima, xanīfo chaka fetsa. Nā xanīfo siete ipaonifo keskara nāri chakakōi. A iyopaonikai iskaratīa anā xanīfoma. Nāskakē nāri fetsafo fe omiskōipakenakafo mēra kai anoax anā kāinakafoma.

¹²“Askatari nā mǎxo diez mī ōiai mǎxokōima. Nāōxō diez xanīfofo noko tāpimani. Nāfo xanīfofo iyoafoma. Chipo mani fetsafo anoax nā diez āto xanīfofo itirofo. Na yoinā pōfe keskara fe xanīfo ixikani. Askafikanax xanīfoi chai samaraka kanima. ¹³Nāskakē nā diez xanīfofofāfe shināmisfo: ‘Na yoinā pōfe keskara nōko xanīfo iki kiki,’ ixō shinākani. Nāskakē, ‘Mī noko yoiai

keskara nō atiro,’ ixō nā diez xanīfofofāfe nā feronāfake yoinā pōfe keskara yoikani. ¹⁴Nāskaxō nā feronāfake yoinā pōfe keskarato nōko Ifo Jesús afe yorafoya noikaspai, xanīfofo fetsafāferi ato noikaspaixikani. Nā yoinā pōfe keskarato nā diez xanīfofo feta Jesús yafi afe yorafo retepaikani. Retemapaiiaifono Jesús ato kanāxii. Niospa ato katoa afe yorafo kena a Ifofamisfo. Nāfāfe afara afeskarafiaito nōko Ifo kachikiri famisfoma. Nōko Ifo Jesús xanīfo fetsafori ato ikitiro. Nōko Ifo finakōixō keyokōi ato ikitiro. Akka tsōakai nōko Ifo Jesús finōtiroma,” ixō nā Niospa ājirinī ea yoia.

¹⁵Askano afianā ea yoia iskafakī: “Na mī ōiai nā kēro feromakōi keskara, fakafā femākīa tsoa nā fakafākai fakafākōima, askatari yorafo mai fetsa anoafoma, meka fetsayafo. ¹⁶Nā diez xanīfofo feta nā xanīfo yoinā pōfe keskarato nā kēro feroma keskarakaxō noikaspakōixikani. Keyokōichi āfe afara fīaxikani anā aya inōma. Nāskakē anā tsoa nā kēro feroma keskara fe ipaikanima. Poomānā retexō koshi pikī keyotiro. Nāskafakīri nā diez xanīfofo feta nā xanīfo yoinā pōfe keskarato nā kēro feromakōi keskara chakafaxikani omiskōimayanā. Askafaxō chīi koofaxikani anā ninōma. ¹⁷‘Mī noko yoiai keskara nō atiro,’ ixō nā diez xanīfofofāfe xanīfo yoinā pōfe keskara yoikani. Akka Niospa anori ato shināmāna a apaiyai keskara fanōfo. Askata taeyoi Niospa yoiyoni nā inōpokoai keskara nāskarakōi ixii. ¹⁸Na kēro feromakōi keskara mā ōiai kērokōima, akka nā pexefā rasi Babilonia keskara. Babilonia anoax yorafo chakakōifo. Nāfāfe manifo tii

anoa ato ikināno ato chakafakani ato keskara ikaxō,” ixō Niospa ājirinī ea yoia.

Ājiri fētsa yoia iskafakī: “Iskaratīa Babilonia pexe rasi mā keyoa,” ixō yoia

18¹Askata anā ājiri fetsa nai mēranoax mai ano fotoaito ē ōia. Epa Niospa yoia nā xanīfo fētsari afama mīshti atiro. Nāato chaxaito maifo tii anoxō ōikani. ²Fāsikōi yoia iskafakī:

Pexefā rasi Babilonia anoafō mā keyoa, anā anoma. Iskaratīa anā ano tsoa ikama, askatamaroko niafaka yōshi chakakōifo ano ika, askatari peya yōshi chakakōifori ano ika. ³Nā kēro chakapa yorafo ato māmā pae ayamatiro keskafakī, nāskarifiakī nā Babilonia anoafāfe yora fetsafo mai fetsa anoafō ato afara chakafamafo ato keskara inōfo. Āto xanīfofori ato askafamafo. Askatari afara sharafos fichipaimisfo. Nāskakē a afama mīshtifo ato minimisfo, afara ichapayakōifo,

ixō yoiaito ē nika. Niospa inapa askara ato yoia a Niospa keyoxiai a Babilonia anoafō.

⁴⁻⁸Yoikī askafatanaino nai mēranoax mekaito ē meka fetsa nika iskai mekaito:

Babilonia ano ikafāfe fāsi afara chakafakī finakōiafo. Nā afara chakafamisfo Epa Niospa ato ōia chakakōifaifāfe. Nāskakē ato omiskōimaxii. Nā Babilonia anoafāfe fetsafo afara chakafamamisfo afori. Epa Niospa ato omiskōimakī finakōixii omiskōinōfo. Nā Babilonia ano ikafāfe āto shinā mēraxō mā shināfo iskafakakī: “Nō Nios yopaima. Afara fetsafori nō yopaima. Nō isharakōimis. Oa xanīfokōi isharamis keskara nōri nāskamis, xanīfo keskara.

Nōkai oa kēro ifomafa keskarama. Nō omiskōitiroma. Askatamaroko nō isharapakenaka,” ixō kakapaimisfāfe yoimisfo. Akka Epa Niospa ato fāsi omiskōimani omiskōikakī tenēnōfoma. Akka nā ea chanīmara faafāfe, ea nikasharakāfe. Epa Niospa mā ato samamashta omiskōimani anā isharayamanōfo. Atiri ē ato namai, atiri ē ato omiskōimani, a piaifori ato kēyoi. Nāskakē fonāikani. Nāskatari atiri ē ato koofaxii kooi fetsenōfo. Tsōa atiroma keskara Epa Niospa afama mīshti atiro. Nāskakē Epa Niospa mato yoi iskafakī: “Efe yora mīshtichi, Babilonia anoafō keskara iyamakāfe. Ato fe rafeyamakāfe. Ato feta chakafayamakāfe ē ato omiskōimanai keskafakī, matori ē omiskōimanōma,” ixō Epa Niospa ato yoixii kiki,

ājirinī faito ē nika.

⁹Askano Babilonia kooaino mai fetsa anoafāfe āto xanīfofōfāfe ōikakī manoxikani. Nāfāferi Babilonia anoxō afara chakafakī tāpinifo. Nāskakē ato feta Epa Nios chakafakakī potakani afara chakafaxikakī. Nā Babilonia anoafō keskarafori afāfe afama mīshti ichapa fimisfo. ¹⁰Babilonia kooaino nā xanīfofo ratekōixikani chai inoaxri fetsafo mesexikani.

iOoa! Babilonia anoafō fato yora fetsafo keskarafori. Mā tāpikōisharafikē samamashta Epa Niospa mato omiskōimani mā kooi fetsenō. iKeexto! Koshikōi Babilonia mā kooi keyoa. Nōri iskayamapainō, ixō shinākani xanīfofōfāfe ratekōiyanā.

¹¹Nāskatari maifo tii anoafō āto afama mīshtifo minimisfo oiaxikani shināmitsakani. “iOoa! Mā Babilonia kooi keyoa. Iskaratīa anā nōko afama mīshtifo noko tsōa fiatiroma. ¹²Nōko oro ōshishara fiayamata, a kerekōi

fakkai fakkaisai fiayamata, nõko tokirinĩ fakeshta fakkai fakkaisai fiayamata, nõko tokiri fetsa ãfe ane perla fiayamata, nõko sama sharafinakõia fiayamata, nõko sama nana shara fiayamata, sama fetsa fetsatapafo fiayamata, nõko ifi nakas sharakõi fetsa fetsatapafo fiayamata, tokiri keskara kerexkõi oxosharakõi ãfe ane mãrfil nõato afarafo onifaa fiayamata, afe keskarara ifi sharakõifo fiayamata, firo shara ãfe ane bronçe fiayamata, keno fetsa ãfe ane firo fiayamata, tokiri ãfe ane mãrmõlo fiayamata, nõfo kopikõifo noko anã fiakanima. ¹³Akka nõ pĩchamis afama mãshtifoya osixõ, nõ itsa sharafoya fetsa fetsatapafoya osixõ, afo noko tsõa fiatiroma. Askatari a nakas shara ãfe ane incienso, fetsari mãrra, fetsari pirofomã, fetsari vinõ, fetsari xini, fetsari arinã, fetsari trigo, askatari nõko yoinã inafori ovejari, kamayori, nõko karori, yonomatifori, nõfo noko anã tsõa fiatiroma. ¹⁴¡Ooa! Babilonia anofãfe nõ afara fetsa fetsatapafo fichipaikakĩ anã fitirofoma. Keyokõi afara sharafo fichipaikakĩ mã fimis anã anoma mã fenokõia anã mã fipanã. Mã afaa yopakima mã fimis. Mãkai anã fitiroma. Keyokõi nõ mãtonã mã keyoa,” ixõ nõ inãmitsamisfãfe yoixikani.

¹⁵Nã mai fetsa anoa fẽkaxõ afama mãshti minikaxõ kori ichapa fimisfãfe mã noko kaxõ chaima nĩxõ ato õikani, ratekõiyana, oiakani, askatari shinãmitsakõikani. ¹⁶Yoikĩ iskafaxikani: “¡Ooa! Fato fetsakai Babilonia anoafõ keskarama. Ato fe yorafãfe rapati sharakõifo safeafo. Rapati õshi sharafo, askatari oro teoti safeafo, tokiri fakkai fakkaisai keskarari menexemeafo, perlari askari faafo. ¹⁷⁻¹⁹Koshikõi na afama mãshtisharafo mã keyokõia,” ixõ yoixikani.

Nãskarifikai nõ kanõanãfã ãfe ifofãfe shinãkani, a kanõanãfã mãra fomisfãferi shinãkani, a kanõanãfã nexa yonomisfãferi shinãkani, a kanõanãfã mãra fokaxõ, ato afama mãshti minikaxõ kori fimisfãferi shinãkõikani. Babilonia kooaito chai ixõ õikani manokakĩ shinãxikani. “¡Ooa! Fato pexe fetsakai Babilonia keskarama. Na Babilonia fistiõxõ kanõanãfãfã ãfe ifofãfe kori ichapa fimisfo. Akka a aya imisfo koshikõi mã keyoa,” ixõ a kanõanãfãfõ yonomisfãfe yoixikani.

²⁰Askaifono keyokõi Epa Nios ika anoafõ inimakãfe. Babilonia anoafãfe a Jesús chanĩmara faafo ato omiskõimamisfo, Epa Niospa ato kopikĩ omiskõimaxii. Nãskakẽ keyokõi a Jesús chanĩmara faafo fe, Jesúsxõ ãfe meka yoipaonifo fe, a Niospa meka inõpokoai yoimisfori inimakãfe.

²¹Akka Epa Niospa ãfe ãjiri fetsa mitsisipakõichi tokiri efaapakõi fininifõfata fakafã mãra potaxõ yoia iskafakĩ: “Na tokiri kerexkai ã potai keskafakĩ, nãskafakĩri Epa Niospa na pexe rasi anoafõ Babilonia kerexkai omiskõimana kooi keyonõ. Mã keyokõikanax anã ano tsoa ikima. ²²Nãskakẽ anã Babilonia anoax manetifo, xãitifo, maneti fetsafori, afo anã tooxikama. Askatari anã tsoa fanãikama. Tsõakai anã ato nikatirofoma. Askatari a yonomisfo anã ano ikafoma. Askatari a aõ xiki reneaifo nõ anã nikatiroma. ²³Anã luzri õtapakenakama. Feronãfãke kero fiaino inimaifãfe mã nikamis keskara anã tsoa askara mã nikapakenakama. Babilonia anoafõ a inãmitsamisfãfe tãpikõikani. Nãfãfe ichapakõi fimisfo. Askatari koshoi tãpixõ yora fetsafo pãramisfo. Askafikanax mã keyoafo.

²⁴“Babilonia anoafãfe a Niospa meka yoimisfo, fetsafori a Jesús chanĩmara

faafo, fetsafori mai fetsa anoafo ato retemisfo Jesús oikaspakakī. Niospa meka mato yoipaifiaifono mā ato nikakaspamiskē, Niospa mato omiskōimana,” ixō Niospa ājirinī yoia.

Nios ika anoax fanāiki iskakani: “iAicho! Nōko Ifo Nios sharakōi,” ikaxō Niosnoa afara sharafo fanāikani

19¹⁻²Askata nai mēra ikafo ichapakōi āto meka ē nika, fāsikōi iskaifāfe:

A fetsafāfe chakafamisfo Epa

Niospa ato omiskōimani. Chanīmakōi, ato omiskōimani. iAicho! Nōko Ifo Nios fāsi sharakōi. Nāato nōko chaka noko soaxona nō afe nīpaxanō. Aōnoa fisti nō yoitiro iskafakī: “Mī nōko Ifokōi. Fato fetsakai mia keskarama afara sharafamis. Mī sharaōxō mī afama mīshti fatiro,” ixō keyokōichi yoipakenakafo. Epa Niospa Babilonia anoafo atoōnoa iskafakī yoia: “Nā Babilonia anoafo nā kēro feromakōi keskarafo. Nā chakafamisfoōxō maifo tii ano ikafori ato chakafama. Nāskakē Babilonia anoafāfe ea fāsi chakakōi famisfo. Efe yorafori ato omiskōimakani nanōfo. Nāskakē ē ato kopia omiskōimakī,” ixō Epa Niospa yoi,

ixō yoiaifāfe ē nika. ³Afianā meka fetsari ē nika nai mēranoafāfe yoiaifāfe iskafakakī:

iAicho! Nōko Ifo fāsi sharakōi.

Afaa chakafamisfa. A chakafamisfo chanīmakōi ato omiskōimani. Ato chiifā mēra potano afo kooi nishpapakenakafoma,

ixō yoiaifāfe ē nika.

⁴Askanori Epa Nios tsoafo ano nā veinticuatro xanīfori nā Nios onifani cuatro a nāmā feopakekafakī iskafakī yoiafo: “Askapainō. iAicho! iNōko Ifo fāsi sharakōi!” ixō yoiaifāfe ē nika.

⁵Askata Epa Nios tsoafo anoā ē meka fetsa nika iskafakī yoiaito:

Epa Nios yonoxomisfāfe xanīfofōfāfe askatari afamafōfāfe mato Niospa yoia keskara mā apaikōimis. Māri Epa Nios yoikāfe iskafakī: “iAicho! iEpa Niosi, mī sharafinakōia!”

ixō yoiaito ē nika.

Feronāfake āfiyakī fista atiro inimakī. Nāskarīfakī Jesús nai mēraxō noko fista axoxii nokoki inimakī

⁶Askatari ē anā nika yōrafā rasi mekaifāfe nā fakafā poo ikai keskara, askatari fāsikōi nai tiri ikai keskarari ē nika āto meka:

iAleluya! Nōko Ifo Nios tsōa atiroma keskara afama mīshti fatiro. Nā nōko Xanīfo finakōia. Maifo tii anoafo noko ikitiro. iAicho! iNōko Ifo Nios sharafinakōia! ⁷⁻⁸Akka feronāfāke kēro fiaino nā kēro inimakōi itipinīsharatiro āfe fene fe fianāxiki. Nāskarīfai nōko Ifo Jesús fe iskaratīa afe yorafo afe ipanakafo. Akka afe yorafo mā itipinīsharafo afe ipaxakakī. Akka āfinī āfe fene inimamapai itipinīsharatiro. Sama fena sharakōi patsaxō safetiro afe fianāxiki. Nāskarīfakī nā Jesús Ifofamisfāfe itipinīshara fatirofo. Epa Niospa ato shara fapaikī, ato chaka soaxoni Jesús fe ipaxanōfo. Nāskakē nō inimai. Tsoa fetsakai mia keskarama afara shara famis, ixō yoiafo. Niospa yorafāfe Jesúsxō fetsafo sharafamis. Nāskakē Niospa ato rapati sharafinakōi safemana Jesús fe ipasharanōfo.

⁹Askatari ājirinī ea yoia: “Ē mia yoiai keskara kenefe iskafakī: ‘Ēfe Fake Jesús iskaratīa keyokōi afe yorafo ichanāfai afe ipaxanōfo. “Niri fekāfe,” ato faino, nikakanax inimakōikani. Nāskakaxō ēfe

Fāke feta pikani afe ipaxakakī, ixō Epa Niospa yoia. Nāskakē Epa Nios āfe meka mā chanīmara fatiro,” ixō ea yoia.

¹⁰Ea yoiano ē a nāmā feopakekafana, “Mī fāsi sharakōi,” ixō yoixiki. Ē askafaino ea yoia iskafakī: “Ea askafayamafe. Ēri Nios yonoxomiski mī axomis keskafakī, a Nios Ifofaa fetsafāferi askafamisfokī. Jesús mato yoiai keskara mā kachikiri famisma. Nāskakē Nios fisti nāmā nō feopakekafā yoitiro: ‘Mī fāsi sharakōi. Mī ēfe Ifokōi,’ ixō anori fisti nō yoitiro. Nā Niospa meka yoimifāfe yoimifso keskarifakī ěri Jesúsnoa yoimis Epa Niospa ea shināmanaino,” ixō ājirinī ea yoia.

Jesús mai ano afianā oxiai keskara yoi

¹¹Akka ē anā ēfe namapa ōia keskara anā ē mato yoinō mā tāpinō. Epa Nios ika anoa nai mēranoa ē ōia. Fepoti fepekemea keskara ē a mēra ōia.

Nāskara Epa Nios ika ari xafakīakōi ē ōia. Nāno kamayo oxokōi ē ōia. Nā kamayo kamaki Jesucristo nōko Ifo tsaoa. Āfe ane ichapa. Āfe ane rafeōnoa ē mato yoinō. Fētsa, “Nā Yoia Keskara Akōimis.” Akka āfe ane fetsari, “Chanīmisma.” Nāato chanīmākōi yora chakafo omiskōimani. Niospa meka nikakaspamifono a omiskōipakenakafo mēra ato potaxii. ¹²Āfe fero rafe chii xofisai keskara. Fakishi chii xofisaino yōra ōisharatiro. Nāskarifakī nōko Ifāfe yorafāfe āto ōiti mēraxō shināifo keskara tāpia. Xanīfāfe maiti sharakōifo ichapakōi maiafo ika. Āfe femānāki āfe ane kenea. Ares fisti nā ane tāpia.

¹³Rapati chainipa safea. Nā rapati imiki momoa. Nāskara ōikī ea shināmāna Jesús noko nāxonī. Āfe ane fetsari, “Niospa Meka,” famifso. ¹⁴Afe yorafo nai ariax kamayofo oxokōi kamaki āto Ifo kachiori fokani. Āto rapatifo oxokōi chainipa safeafo. Nā rapati oxokōi rama

pātsaxona keskarrafo. ¹⁵Āfe axfa mēranoa keno chainipa ikiaikōi ē ōia. Akka āfe kenoma, āfe meka. Āfe mekapas maifo tii anofo nikayospamisfo omiskōimani. Maifo tii ato ikinā, fetsafo nikayospamisfo ato kerexkai omiskōimakōi. Āfe meka nikakaspamifono Nios ōitifishkikōini. Akka Jesúsxō ato omiskōimani, omiskōipakenakafo mēra ato potaxii. ¹⁶Jesús āfe ane fetsa āfe rapati chainipaki kenea mānākiri keneta maikiriri kenea iskafakī: “Xanīfo maifo tii anoa āto Xanīfo finakōia, askatari āto Ifo finakōia,” ixō kenea.

¹⁷⁻¹⁸Askatari ē ōia ājiri fetsa xini ano nīxō fāsikōi yoia iskafakī: “Xanīfofo ikaino, sorarofa āto xanīfofo ikaino, āto xanīfofo fe rafea ikaino, feronāfakefo mitsisipafo ikaino, kamayofo ikaino, a kamayofo kamaki tsaoafo ikaino, keyokōi Niospa meka nikakaspamisfo ikaino, ato yonomatifoma ikaino, a āto yonomatifoma ikaino, yora afamafori ikaino, a yora finakōiafo ikaino, keyokōi Niospa ato namaxii,” ixō yoia. Nāskakē ishpifo ato yoia: “Fekāfe āto nami pixikakī,” ixō nā ājirinī ishpifo kena.

¹⁹Askatari afianā ē ōia a nōko Ifo Jesús noikaspai nā yoinā pōfe keskara yafi maifo tii anoa xanīfofo āfe sorarofoya ēfe namapa ōia keskara ē ōia. Mā ichanāfo Jesús āfe kamayo kamaki tsaokē afe yorafoya retepaikani. ²⁰Akka ato retetamaroko Jesús ato achia chiifā mēra ato potaxiki. Nā ato pāramisto, “Ē Niospa meka mato yoimis,” ifiax āa chanīmis. Nāato na yoinā pōfe keskaraōxō tsōa atiroma keskara famis Satanás yōshixō. Nāskaxō keyokōi yorafoki kenea nā marakkaōxō yoinā pōfe keskara tāpixikani. Nāfāfe yoimifso iskafakakī: “Mī ēfe nios. Ē mia noi,” ixō anori yoinā pōfe keskara yoimifso. Akka nā ato pāramisto yōra

atiroma keskafakī afama mīshti faito nāfāfe ōiafo. Nāskakē ato pārakōia. Nā yoinā pōfe keskara fe nā ato pāramis naafomano iriyafī Jesús ato chiifā mēra pota. ²¹Nā rafeta āto ināfo Jesús āfe kamayo kamaki tsoaxō āfe mekapa ato reteaino nai fetseāfo. Mā naafono ishphifo atoki ichanākaxō āto nami pikani māyakōiafo.

Jesús Satanás achixō nexaxii mil xinia

20 ¹Askata Niospa ājiri Nios ika ariax fotoaito ē ōia, chamis keskara tsoma. Nā niafaka chakafo kinīfā fakishifā mēra ikafoki atoki fepoti fepoa keskara ē ōia. Nā Niospa āfe ājirinī fepotinī āfe chamis yafī kaninā efapa tsoma ika. ²Tsoaxō nā ronōfā keskara achia. Nā ronōfā keskara nā niafaka chakakōi Satanás. Nā achixō nexa. ³Nāskaxō kinīfā fakishifā mēra pota. Potata akiki fepokōia mil xinia a mēra inō anā yorafo pārānōma. Mā mil xinia finōano afianā kāimayoxii samarakatama chaimashta anā mai ano kafāsayonō.

⁴Askata xanīfāfe tsaotifo Epa Nios ika anoa ē ōia. Jesús afe yorafo yoia nā tsaoti kamaki tsoafono, “Mā yoitiro fatofomākī omiskōipakenakafo mēra foaifoma, akka fatoforimākī a omiskōipakenakafo mēra foaifo.” Askano nānoari ē ōia nā Jesús chanīmara faafo yamī ato textenifo. Ato texteyoafomano yoiyopaonifo: “Jesús nōko Ifo,” fayopaonifo. Niospa meka ifofamisfono, nāskakē ato textenifo. Akka nāfāfekai nā yoinā pōfe keskara yafī āfe nimofa yoimisfoma iskafakakī: “Mī nōko ifo nios. Nō mia noi,” ixōkai anori yoimisfoma. Askatari aō ato tāpinōfo āto mēke yafī āto femānā kenemisfoma. Nāskakē nā yoinā pōfe keskara atoki ōitifishkikī ato textemani. Mā nai fetsefiafono Jesús ato otoani. Mā

otokaxō Jesús feta maifo tii anoāfo mil xinia yorafo tii ato ikināfo. ⁵Nāfo mā otoafono mā mil xinia keyoano fetsafori Epa Niospa ato otoaxii. ⁶Shinākapo efe yora mīshtichi, mato yoiai keskara. Noko Epa Niospa otofakī taefaxii. Noko katoni afe yorafo nō inō. Epa Nios feta Cristo noko yoiai keskara nō fetsafo Epa Nios kīfixomis. Nō omiskōifikatsaxakī Jesúsnoax omiskōifikatsaxakī naax nō omiskōipakenafo mēra kanakama. Askatamaroko Cristo ika anoxō a feta fetsafo nō ikixii. Nāskakē Jesús keskara shara ikax nō fāsi inimaxii.

Satanás kinīfā chaikōi mēranoa kāimayoi anā yorafo pārānō. Ato askafaino koskikōi anā kinīfā mēra potaxii anā kāipakexanōma

⁷⁻⁸Askata mā mil xinia finōano Satanás kinīfā fakishifā mēranoa anā kāimayoxii anā maifo tii anoāfo ato pārāyonō. Askata mā kāixō nā Nios nikakaspaifo maifo tii anoa ato ichanāfai nā Niospa yorafo ato retemaxii. Ichanākani ichapakōifo. Nā Nios nikakaspamisfo tsōa ato tanātiroma. Gog anoax fekāta, Magog anoax fekāta, ikanax ichanāfo Nios nikakaspamisfo. ⁹Maifo tii anoāfo ato ichanāfaxii Niospa yorafo ikafo anoa ato cheteakenōfo ato retexikakī. Ato askafaifono Epa Niospa afe yorafo noikī ato ifixii. Nā yorafo Satanás ichanāfaa no nai mēraxō atoki chiifā potano nai fetsekani anā tsoa pishta ninakama. ¹⁰Akka nā Satanás niafaka chakata yorafo feparamiskōikē Epa Niospa chiifā mēra pota. Nā taefakī nā yoinā pōfe yafī nā ē mato Niosnoa mato yoimisra iki a chanīmis ato mērari Satanás niafaka chaka Epa Niospa pota. Nā tii chiifā mēranoax omiskōikani xatenakafoma.

Jesús chanīmara faafoma ato omiskōimaxii

¹¹Askata xanīfāfe tsaoti oxokōi efapakōi ē ōia. Nāno Epa Nios tsoa.

Akka mai fe nai anā ano ikama.

¹²Askata ē ōia nā xanīfofo fe nā yora afamafori nakanax Epa Nios tsaao ano niafo. Nāno niafono Epa Niospa āfe kirikafo fēpea. Kirika fetsari fēpea. Nā kirikaki nā Ifofamisfo atoki kenea. Akka a Ifofamisfoma atoki keneama. Akka nā kirikanā āfe ane Nīpamisfo. Nā nayoxoma apaonifo keskara kirikafo mēra keyokōi Epa Niospa mā keni. Nāskakē nā afara chakafapaonifo keskara atoki kenexō ato ispai tāpinōfo chanīmakōi ato omiskōimaxii. ¹³Nā āsamisfo fe mai anoax namisfori askatari fetsafori nafiakanax otoyokanima keyokōi namisfo Epa Nios āfe ferotaifi feafo. Nā chakafamisfo tii Epa Niospa ato omiskōimapakea.

¹⁴Keyokōi nā Niospa meka nikakaspamisfo Epa Niospa ato chiifā mēra pota. Mā nafianifono iskaratīa afianā ato chiifā mēra potaito ē ōia. Nānoax omiskōikani xatepakenakafoma. ¹⁵Akka nā kirika āfe ane “Nīpamisfo” a mēra Epa Niospa āto ane kenemisma, nāfo chiifā mēra pota. Nāskara ē ōia Epa Niospa ea ōimanaino a ixiai keskara mai keyoaino.

Nai yafi mai fenakōi Epa Niospa onifaxii

21 ¹Akka nā ēfe namapa ōia keskara Epa Niospa anā ea ōimana. Ē ōia nai yafi mai fenakōi Niospa onifaa. Nā nai yafi mai taefakī onifani yamarisatana. Fakafāri yamarisatana. ²Askano ē ōia Niospa yorafo nāfāfe Jesús Ifo shara famisfo nai mēranoafo Epa Nios ika ariax fotokani. Nāfo ikafo Jerusalén fena ano. Nā Jerusalén fena Nios ika ariax nāmā fotoa nāno ikafo. Fotoaifono ē ōia fāsi sharakōi. Akka kēromā āfe sama sharakōi safetiro itipinīsharaxikī fene fe fianāxiki. Nāskari fakī Epa Niospa nā Jerusalén fena itipinīshara faa sharakōi

inō afe yorafo nāno afe nīpaxanōfo.

³Askano Epa Nios tsaao ano meka achakōi ē nika. Yoia iskafakī: “iAicho! Iskaratīa Epa Nios yorafo fe ixikiki. Ato mēra ixii nāfo afe yorafo inō, nā yora fisti keskara. ⁴Ato kexesharaxii anā tsoakai omiskōitiroma. Ato noikī oiaifono Epa Niospa ato shināmasharaxii āto fēo tereaxoxii anā shināchakakakima tanaima inimanōfo. Ato kexeaino tsoakai anā natiroma, anārikai manomitsai oiakanima, anārikai paemekanima. Afara chakafo iyopaoni keskarakai anā askanakama,” ixō yoia.

⁵Askata Niospa āfe tsaoti kamaki tsaoxō yoikī iskafaa: “Ē keyokōi fenafai,” ixō Niospa yoia. “Ēfe meka chanīmakōi. Nāskakē nā mī nikai keskara kenefe,” ixō ea yoia.

⁶Askaxō anā Niospa ea yoia iskafakī: “Mē aka. Iskaratīa ē yoiyoni keskara mē keyoa. Afara onifataima ē iyopaoni. Afetiara maifo tii keyoai eres fisti ē yoitiro. Ē keyokōi ikinā. Ēfi nīpamiski. Fetsa nōamāikī yoitiro iskafakī: ‘Ē faka fenakōi naxikima,’ ixō yoitiro. Nāskarifiāi fetsa ipaisharapaikōikī yoitiro iskafakī: ‘Ēa ē isharatiroma. Ē Nios yopakōi,’ ixō anori yoiaito ē inimakī ifitiro, efe ipaxanō. ⁷Fētsa ea kachikiri fatamaroko nā naitīa ea Ifofasharaxō nāato keyokōi nā ē mia yoia keskara fixii. Ē kaxpa ināxii. Ē āfe Nios ixii. Akka ēfe fake ixii. ⁸Akka fetsa ratei eōnoax omiskōikaspakī ea kachikiri faa, askatari fētsa ēfe meka nikakaspamis, fētsari afara chakafo fetsa fetsatapafo xatekaspai, askatari fetsari retemitsamis, fetsari āto āfima chotamis, askatari kēromāri āto fenema chotamamis, fētsari koshoiti tāpiax nā niafaka chakafo fe rafemis, askatari fētsari ea noitamamaroko afara fetsa noikī, ‘Na ēfe nioski,’ famis. Nāskakē askarafo

fe nā chanīmisfo afokai efe nīpanakafoma. Chiifā mēra nā omiskōipakenakafo mēra ipanakafo. Anoaxkai faki fonakafoma,” ixō Epa Niospa ea yoiā.

Jerusalén Fena

⁹Askata Niospa ājirinī siete kecho keskara mēra afara chakakōi fospia maifo tii ano nachixii ato omiskōimanō fētsa ekeki oxō yoikī iskafaa: “¡Ofe! Ē mia afara sharakōi ōimanō. Akka feronāfāke mā āfiyaxō kexesharatiro. Nāskarifikā Jesús chanīmara faafo afe yorafo ifia. Ofe. Ē mia ōimanō,” ea faa. ¹⁰⁻¹¹Askano Niospa Yōshi Sharapa ea īkināino Niospa ājirinī ea machi efapa keyakōi ano ea iyoa keyokōi ē ōinō. Jesús chanīmara faafo nā Nios ika anoafo ato chaka soaxona nāfo nai mēraano Epa Nios ika ariax fotoaifāfe ea ōimana. Na māchifā keyakōi anoxō ea ōimana. Nāfo ika ano āfe ane Jerusalén Fena. A mēra ikafo Jesús Ifo shara famisfo. Epa Niosri ato fe ika. A ato fe ika ano fakkai fakkais isharai. Tokiri fakkai fakkais ikai keskara sharafinakōia. Nā tokiri āfe ane jaspe fēxta shara, tokiri fetsa āfe ane cristal. Shara fakkai fakkais ikai keskara. ¹²Nā tokiri kenea efapa Jerusalén foake tii fayakena. Nā kene keyakōi doce fepotiya. Nā doce fepoti ano Niospa ājiri niafo kexesharaxikakī. Israel iyopaonito āfe fake doce ipaoni. Nā docefāfe āto fakefo paxkanifo. Nāskakē fepoti tii āto anefo doce kenea. ¹³Nā kene keya āfe fepoti ichapaya. Xini oaikiri tres ikaino, xini kaikiri tres ikaino, xini kaima anori tres ikaino, xini oaima anori tres ika fepoti ichapaya. ¹⁴Nā kene keyakōi tokiri doce efapanāfā kamaki kenea. Jesúsnoa yoimisfāfe āto anefo nā tokiri doceki kenea.

¹⁵Niospa ājirinī nā ea taefakī yoiato, nāato tanati oro tsoma, Jerusalén Fena tanaxii, āfe kene yafi āfe fepoti tanaxiki.

Nā tanati tafa chainipa keskarafiax oro ōshi keskara sharakōi. ¹⁶Nā Jerusalén Fena āfe kene keya senēsharakōi. Āfe chainipa fe āfe xākī nātixō rafe. Āfe keyari nātixori. Niospa inapa tana dos mil dos cientos kilometro āfe chainipa fe, āfe xākī, āfe keyari. ¹⁷Āfe kenefo keyakōi a akiki kenea sesenta y cuatro metros. Nā Niospa ājiri yorafāfe tanamis keskari fakī nāatori metropa tana.

¹⁸Nā Jerusalén Fena sharakōi. Nā manishomo fēxta nō ōimis keskara sharafiax ōshi keskara. Nāōxō Epa Niospa Jerusalén Fena onifaa. Askatari a kenea keyakōi nā tokirinī āfe ane jaspe Niospa onifaa. ¹⁹Tokiri sharakōifo fetsa fetsatapafo Epa Niospa onifaa, nā doce tokiri kamaki nā kene keya tsaao. Taeyoi jaspeki iyoa. Āfe pefeta zafiroki ika. Āfe pefetari agataki ika, āfe pefetari esmeraldaki ika, ²⁰āfe pefetari onīceki ika, āfe pefetari cornālināki ika, āfe pefetari crisolitoki ika, āfe pefetari beriloki ika, āfe pefetari topacioki ika, āfe pefetari crisoprasaki ika, āfe pefetari jacintoki ika, āfe pefetari amātistaki ika; nāfo sharakōifoki nā kene Epa Niospa nimainīfofāni. ²¹Nā kene keyapa āfe fepotifo perla oxo efapa Niospa onifaa. Nā perla tokiri keskara oxo sharakōi. Nā perla fistiōxō fepoti fisti onifaa. Nāskakē doce fepoti onifaa nā perlaoxō. Nā Jerusalén Fena āfe fai manishomo fēxta sharakōi keskara oke rafe nō ōitiro. Manishomo fēxta keskara sharafiax oro ōshi keskara shara.

²²Akka Epa Nios kīfiti pexefā anoma. Epa Niospa nā afama mishti fatiroxakī nōko Ifo Jesús noko fe Jerusalén Fena mēra imisfo. Askatari yorafāfe Epa Nios kīfiti pexefā nā anā yopanakafoma.

²³Nāskarifikā anā xini yafi oxe yopakanima Epa Nios fe Jesús ato fe ikano. Epa Nios nāno ato fe ixō ato chaxaxoni. Jesúsri ato askafaxōi

ōisharakōinōfo. Anā afaa yopakanima.

²⁴Mai fetsa anoaxri fofāsatirofo Epa Niospa ato chāxano. Xanīfofori Jerusalén Fena mēra ikikaxō a aya imisfo afara sharafo ināxikani. ²⁵Nāno fakishri anā ikima. Fakishpakenakama. Akka anā Jerusalén Fena āfe fepotifo fepopakenakama. ²⁶Akka fetsafori maifo tii anoax Jerusalén Fena mēra ikikakī a aya imisfo ato afara sharafo ināxikani. ²⁷Akka afara chaka nā Jerusalén Fena mēra ikitiroma. Nā chaka shināmisfo fe a afara chakafamisfo, a ato pāramisfori afo ikitirofoma. Akka Jesús āfe kirika mēra āto ane keneano afe ipaxatirofo. Nāfo fisti Jerusalén Fena mēra ikitirofo Jesús fe ipasharaxikakī.

22 ¹⁻²Askano ēfe namapa ōiai keskara Niospa ājiri fētsa ea ōimana afe keskaramāki Nios ika ano. Nios fe Jesús tsaao anoax faka shara fakkai fakkaisai keskara kafani, fai nēxpakīa. Afara choshta a mēra ikitiroma. Nāno ikafāfe nā faka shara ayapaiyaitīa ayatirofo, nāskakē nomipakenakafoma. (Nāskarifiakī nāno Niospa noko potapakenakama noko ikipakenaka.) Nānori fai nēxpakīa ifi nia ika. Faka takai raferi nii xokoa ika. Nāno ikafāfe nā nii fimi pipaiyaitīa pitirofo. Nāskakē fonāipanakafoma. Nāskarifiiai Nios nofe ikano nō aōnoax omiskōitiroma nō nisharapakenaka. Nā ifi oxe tii fimimis. Āfe pei tsasimisma xachoko fena shara ipanaka. Nāskarifiiai nā chanīmara faafo tii maifo tii anoax Niosnoax meema sharakōi ipanakafo. ³Nā Jerusalén Fena ano Epa Nios fe Jesús nofe ixii. Nō ato fe yorakōixō nō ato noikōixii. Nō āto yonoxomiskōi nō ixii. Atoki fanāisharayanā nō ato yoisharapakenaka. Akka nōko mai xini ano afara chaka fetsa fetsatapafo imis. Akka iskaratīa nā Jerusalén Fena ano afara chaka a mēra itiroma. ⁴Nānoax

nōko Ifo fe āfe femānāki ōinōnāfafāixikani. Āto femānāki āfe ane ato nētamana. ⁵Nōko Ifo Nios ari ikafo ato penafaxōa. Nāskakē anā rāpari yafi xini yopatirofoma. Anokai anā fakishima. Nāskax afe xanīfo ipanakafo.

Jesús chaima oi

⁶Askata Niospa ājirinī anā ea yoia: “Nōko Ifo Niospa āfe Yōshi Sharaōxō a āfe meka yoimisfo āto ōiti mēraxō ato tāpimamis a afara afeskara ixiai keskara afe yorafori ato tāpimanōfo. Nāskarifiakī iskaratīa āfe ājiri fetsa nīchia afara afeskara ixiai keskara a yonoxomisfo tii ato tāpimanō. Nā ē mia yoiai keskara chanīmakōi. Keyokōi ēfe meka mā chanīmara fatiro,” ixō ea yoia.

⁷Akka yoikī iskafaa nōko Ifo Jesús yoia iskafakī: “Ē nai mēranoax mai ano matoki nokorisai. Nā mī ōia a inōpokoai a mī nikafori, nāfo mī kenetiro. Akka nāfo chanīmara fakakī kachikiri fayamakanax inimakōixikani,” ixō Jesús ea yoia.

⁸Ēkīa Juan ē nika, askatari ē ōia ea Niospa ājirinī ōimanaino. Nāskakē ē a nāmā feopakekafana ēfe Ifo keskara shināi. Nāskaxō, “Mī fāsi sharakōi,” ē fakerana. ⁹Ē askafaito ea yoia iskafakī: “Ea askafayamafe. Ēri mia keskarakī. Mī ikaino, Jesús chanīmara faafo ikaino, āfe meka yoimisfo ikaino, keyokōi nā mī rama kenea keskara chanīmara faafo fe, ēri mato keskara nōko Ifo Nios ē yonoxomis. Akka Epa Nios fisti mī Ifofatiro. Nā fisti nāmā mī feopakekafatiro,” ea faa.

¹⁰Askata afianā ea yoia iskafakī: “Nā mī kenea oneyamafe. Nā mī kenea keskara samama askakōi. Nāskakē a mī kenea keskara keyokōi yorafāfe tāpinōfo. ¹¹Akka mā Jesús nokoaino nā nikakaspamisfāfe chakafakī finakōixikani. Yora chakafamisfāferi

nāskari faxikani chakakōi fakakī. Akka nā Niospa yoiai keskara amisfāfe nāskarakōi fakakī mimakōi faxikani Niospa yoiai keskara akakī. Nā Jesús keskara shara imisfo nāfori isharakōixikani āto Ifo ifosharakōifakani,” ixō Niospa ājirinī ea yoia.

¹²Nāskaxō Jesús anā yoia iskafakī: “Ea nikasharakāfe. Ē matoki samama nokorisai. Nokoxō ē mato yoiyoa keskara ē mato ināsharaxii. Nā afara shara famisfo ē ato shara fata nā afara chakafamisfo ē ato omiskōimaxii. ¹³Afarafo onifataima ē iyopaoni. Ēfi nīpamiskī. Ē niixatepakenakama. Nā māto mai keyoai eres fisti ē yoitiro,” ixō ea yoia.

¹⁴Anā Jesús yoia iskafakī: “Nō Jerusalén Fena mēra ikixō, nā ifi āfe fimi pipaiyaitīa nō pitiro. Nāskarīfiai nō Epa Nios fe ikaino ares fisti noko nimapakexatiro. Nā Jesús chanīmara faafo ato chaka soaxona nāfo fisti Epa Niospa ato ikimatiro afe ipaxanōfo.

¹⁵Nāskakē nā yora chakakōi paxta pōfe keskarafo fe, a koshoiti tāpiafo, nā koshoiti chanīmara faifori, feronāfāke āfe āfima chotamis, kērofāferi āto fenema chotamamisfo, retemitsamisfori, Nioskōima noikī ifofamisfori, chanīmisfori, nā chanī noimisfori, askara yorafokai Jerusalén Fena mēra ikitirofoma.

¹⁶“Ēkīa Jesús, ēfe ājiri matoki nīchia ē mia yoia keskara nā ea Ifaafafo tii ichanāfo anoxō ato tāpimanō. Ēkīa David āfe fena. Ēfi nā fishi efapa penaino ōimisfo keskarakī. Nā fishi ōikī nō tāpitiro mā penaino. Nāskarīfiai mē chaima oaino tāpikanax itipinīsharatirofo Jerusalén

Fena mēra efe ipaxakakī,” ixō Jesús ea yoia.

¹⁷Askano Niospa Yōshi Shara feta Jesús afe yorafāferi yoikakī iskatatirofo: “Jesúsiki fekāfe,” ato faifono, fetsafāferi nikakaxō ato yoitirofo: “Jesúsiki fekāfe,” ato fatirofo. Fētsa nōamā ikī faka yopai, faka ano katiro mā ayax anā nōamā itiroma. Nāskarīfiai fētsa āfe chaka xatepai, Jesúsiki otiro Epa Nios fe ipaxakī. Afaa inātama Jesús chanīmara faax, afe ipaxatiro.

Juan mā mekai xatekī Jesús yoiai keskara keneni

¹⁸Ēkīa Juan, afara ixiai keskara ē mato kenexona. Ē mato kenexonai keskara chanīmakōi. Nā meka ē mato yoiai nikasharakāfe. Ē mato kenexona keskara akka fētsa afianā meka fetsa shinākī keneax, na kirika mēra kenea mā ōiai keskara omiskōipakenakafo chanīmakōi Epa Niospa keyokōi nāfo omiskōimaxii. ¹⁹Askatarī a afara afeskara ixiai keskara ē kenea fētsa na meka atiri soakē Epa Niospari āfe ane soaxii āfe kirika mēranoa. Nāskakanax nā Jerusalén Fena shara mēra ikitirofoma. Ē kenea keskara soakanax nā Epa Nios afara shara yoiyoni keskara, aya ipanakafoma.

²⁰Jesús yoia keskara nānori ē mato kenexona. Nāato yoikī iskafaa: “Chanīma, ē matoki samama nokorisai,” ixō yoia. Askapainō. Nōko Ifo Jesús orisapainō.

²¹Mā Niospa yorafo. Afara afeskara afiaino nōko Ifo Jesús mato noixō mato ōiti mato fēpeaxosharpainō. Askapainōra. Ēri mato fāsi shināi. Nā tii.

Ēkīa Juan